

# Dileeja Dyà Njila Dyà

## Ngabùdyèlè Kùdì Danyèlè



Mukalenge àkubènèshè, mwaneetu. Myoyi yenu ayi mu dinda emu, balunda bàànyì. Kùdì luuyà lukolè be, bwa kusanganyibwa mu tabernacle mu dinda emu, kadi mbya butùmbi be bwa kwikala mwaba ewu. Ndi ne disanka dyàbùngì mutùdiku—mutùdiku bapètè mwa kubwela leelu ewu bwa disangisha edi. Ne ndi mumanyishe ne nêngiikalè mwa kwenza dilonga mpindyewu pa *Mbingu Makùmi Mwandamutekètè Yà Danyèlè* eyi. Aci cìdì ciswikakaja bikwabo bya Mukenji kumpala kwa mèmè kutungunuka kuya ku—ku Bitampi Mwandamutekètè. Mbwenà kwamba ne, Bitampi Mwandamutekètè; Bipùpù Mwandamutekètè; Mpungi Mwandamutekètè; Makènga Asatu; mukàjì mu dībà; diipata dya dyabùlù mukunze; bantu binunu lukama ne makumi anaayi ne binaayi batwibwe citampi; byònsò abi bìdì byènzeka munkaci mwa cikondo eci. Kadi mvwa mwelè meeji ne bikèngela bwa mèmè kwanjì kwangata eci kumpala.

<sup>2</sup> Mpindyewu, kùdì luuyà lukolè. Katwèna ne kiipàcìlà kàà kushààla ntàntà mupitèpìte bule to, anu mutùdì mwa kushààla amu. Ne ewu mmuvù, pa ciibidilu, pambelu pàà muvù, mùdì bantu kabàyi bàtàmba kuya mu ekeleeziya misangu yàbùngì to. Kabidi, nangàngà, bònsò biikàle ne bibambalu ne byamu bifidì bya citaleela, ne bikwabo, mùdì mushindu wà kusòmba bacyankàme. Tutu tujinga bwa twìkalakù naabì, kadi cikondo eci katwèna naabì to.

<sup>3</sup> Bààbùngì bàà ku bankambwa beetu bàvwa bàsòmba pambelu pa muunyà wa ngwengwengwe. Pàndì mèmè ngeela meeji mùndì ndòmba luse kùdì bantu bwa mutùdì ne cibambalu cya kaciyi ne byamu bifidì bya citaleela, meeji àànyì àdì misangu yònsò anu àpingana ku Afrike kùvwàbo bàbàlààdika kwàka mu bipeepèlè bya mvula mwàmwa, ne bantu bakàjì bàba ne nsuki mibàpwekèle mumpala, bàshààlapù ne mundaamuunya ne bufuku, kabàyikù bùùmuka mwaba wùdìbo bàsanganyibwa awu to; kabàyi bàdya, kabàyi bànwà, anyì nì ncinyì, bàshààla anu mwaba awu bwa kubàkulakù anu Dìyì dimwe, anyì abidi, ku musangu ne ku musangu, dya Mukalenge.

<sup>4</sup> Ndi mwa kuvùluka mu Mexique pàdìku luuya lukolè mu mushindu wa ne, bwa kwamba menemene, mèmè musòmbè mu cibambalu ciikàle ne byamu bifidì bya citaleela kadi nteeta bwa kudyèla lupeepèlè, kwikàle luuya lukolè be. Ne mmòna bantu abu bàlwa muntwamu pa dībà citeema wa dinda, mu cipalu cinène aci, kabàyi ne myaba ya disòmba, bwa kusòmbelakù

panshi. Babeedi, bàsaama bikole, bàpùnga ne lufu, bàsaama; kansere, byùjà bya kansere; ne baamamù bàsaama, ne bàna bakese bàà mu mabòko, bàpùnga ne lufu ne bikwabo byònsò, biimàne anu kuulu mwaba awu mu muunyà wa luuvula makoba awu, kakùyì dilèji mwaba nansha wumwe to, anu kacya bèèyemenangana muntu ne mukwèndè kubangila pa dîbà citeema wa dinda apu too ne pa dîbà citeema dilòòlò adi, anu bwa kuteelejilaku tusunsa makumi asatu kùdì mwandamunyi, ne kumòna byenzedi bya Mukalenge. Basòmbe mwaba awu bindile, bavwàle bilàmbà binènè bya bujitu, bàbìvwàla mu muwù wa mashika ne wa luuyà. Ki byònsò bidìbo pààbo naabi.

5 Ne pashiishe ndi ngeela meeji ku diikala balààle mwaba awu mu bisuku ne meetu mwàmwa, mùvwàbo balwamù ne babeedi abu, bàvwà kabàyiku nansha mene mwa kunyunga to. Ne mu Inde, pàvwàbo bàbàkungwija mushiki, bàlààdika ewu pamutu pàà mukwabo, umwe pamutu pa mukwabo, mushindu awu, biikàle ne nsudì ne màsaamà; mùvwàbo bàbàkòkela, ne bàbùumusha mu misèèsù, bàbàtèèka mu myunyà ya luuya lukolè, ya lufyondola mbwa makòbà ayi. Mu bipeepèlè bikolè bya mvula, ne mikenyi yèla, ne bintu bya mushindu awu, bàvwa anu balààdika mwaba awu mu muunyà awu ne bipeepèle bikolè bya mvula abi, ne bikwabo byònsò, ne kabàyiku bànyunga anyì bàdyàbakeena to, anu . . .kadi bàteeta bwa kubàkulakù Dìyì dya Nzambi, ku musangu ne ku musangu, cintu kampàndà bwa musùukà wàbò. Dîbà adi citùdì twètù ne cya kulòmbela luse mu dinda emu ncinyì, pèètù ne musàkà mutùbwikile, eku màkàpàkàpà ànyunguluka? S'bviva bikèngela bwa twètù kudyùmvwakù bundù bwa kudyàbakeena's.

6 Pa nanku ndi mvùluka ne anu abidi aa, mu cisanga kampànda, cimwe cya ku bisanga mu Mbù ya ku Sud mwàmwa, mvwa ngenzamù disangisha dilòòlò adi. Nenku, kaa, kujuukakù cipeepèlè cicolè cya mvula. Kaa, kacya ncìvwakù mwanji kumòna cipeepèlè cicolè cya mvula cya nàka to, anu mukenyi wèla bàwùlonda kùdì mukwabo, wùpenya mu ditùnga dijimà. Ne mushindu wùvwa mpeepèlè yìtuuta mu mushindu wà micì yilààla too ne panshi. Mémè kwamba ne: “Ee, bàdi. . . S'mbipicìibwe ne mémè muumùshe nkooç's, bwalu kakwàkwikalakù muntu kuntu kwàka to.”

7 Mu katancì kakese kàshìnyì kakese aku kulwakù cyànyimànyimà too ne ku ciibi, ne muntu kukookolayè ku ciibi, mudilongòlòle bwa kuya.

Ki mémè kwambila nsongàalùme awu, yèyè ùvwa mumanye kwakula Anglais, mémè ne: “Kùdì muntu kuntwaku anyì?”

Yèyè ne: “Kwèna nansha mwa kubwela mu ntàntà wa kupìta misèèsù yibidi ya mwaba awu to,” mu cipalu cinènè cya ndundu's.

Ki mèmè ne: “Udi muswe kwamba ne bantu bàdi—bàdi kuntwaku mushindu awu anyi,” mèmè ne, “mu cipeepèlè cya mvula cyònsò eci?”

Bòbò ne: “Bòbò’s mbaswe kuumvwa bwalu bwa Nzambi.”

<sup>8</sup> Ki—ki pa nanku mèmè kuya kuntwaku. Nenku kùvwa baainàbànza, nsongààkàjì ya bitende, bansongà, kabàyi bàkenya ku ménù anyi bàseka, anyi bàcyànkunya bàzòkà, anyi bàyiikilangana bwa babangila bààbò to. Dìyì dyònsò, badifile ànuKù; ne kabàyikù bànyunga to, basòmbe anu cyanààna bàtèèleja. Wenza dibìikila dya ku cyoshelu, wenza anu dibìikila dya ku cyoshelu adi anyi, binunu ne binunu bàjuuka kuulu, ne binsònjì bitùnkumuka mu mèsù mushindu ewu, ne byanza byela muulu kùdì Nzambi, bàjinga luse bwa misùùkà yàbò, nsongààkàjì ne nsongààlùmè ya bitende, ya bidimu dikumi ne mwandamutekète, dikumi ne mwandamukùlù. Patùdi twakulangana apa mbikolè bwa kufikisha nansha mene bantu bakolè ku ditèèleja, nudi numòna’s. Bìdì—bìdì bìleeja ne twètù katwèna ne cya kudyàbakeena nansha cimwe to. Twasàkidila kùdì Nzambi! Eyowa’s, mukalenge.

<sup>9</sup> Tuvw’a kujinga kwikala ne bintu byònsò bya cyena-leelu anu mùdì bakwabo bàà mu Amerike, kadi katwena naabi mushindu awu to; pa nanku netwànji anu kukwàta mudimu ne biine bitùdì naabi ebi.

<sup>10</sup> Mpindyewu, ndi ne kaacintu kakese kàndì mumòne ne ndi muswèku kwenza cyàkàbìdì mu tabernacle emu. Mbanganyì bàdì ne Bibles? Elàayi byanza muulu. Bìmpè. Tùbuululàayi mu Misambu 99 kumpala kwa twètù kwenza disambila. Kala wàwa’s tuvwa twenza cyòci eci, Mwaneetu Neville, kùkaadi bidimu. Ncyèna mumanye ní . . . Nukààvwakù babalè Musambu kampànda mu dinda emu anyi? [Mwaneetu Neville ùdi wàmba ne: “To.”—Muf.] To. Mèmè ntu anu muswe, bwà disangisha, kwikalabò bàbalakù Musambu kampanda.

<sup>11</sup> Mu dinda emu, pâmvwà musòmbe mu birò byànyì bya mudimu, ngeelangana meeji pa Mukenji ewu ne Dìyì edi, mèmè kudyàmbidila ne: “Udi mumanye’s, s’mbifwànyìne cyakabidi kwikala bìmpè bwa—bwa kubàbadishakù bònsò Musambu kampànda. Ntu muciswe bikolè be.”

Cìvwà cyenzè ne ndwe anu pashiishe ndambu, ndibìikila dya ntàntà mule dìvwàbò bambìikile, ku Cheyenne, ki civwà cyenzè bwa ndwe pashiishe.

<sup>12</sup> Nenku mpindyewu, patùcìdì tubùulula mu Musambu ewu apa, ndikù ne ndambu wa mamanyisha àdì àkèngelà kwenza, àdìbò bafùme ku dimpèèsha. M’Misambu 99.

<sup>13</sup> “Kubangila ku leelu, bwa mamanyisha ònsò àdì àtàngilà masangisha mu tabernacle emu, ne mu tùmpanyè, neàfuminè kùdì birò mu Jeffersonville. Ewu yònsò udi ne dijinga dya kumanya bwalu bwa masangisha ùdì ne cya kudifundisha dìnà,

anyì kufila dîna dyèndè ne mwaba wùdiye musòmbèlè, ne kubitèèka pa cyambilu kundeelelu kwa disangisha dilòlò edi. Nebàkutùmine kabeji kafùnda pa dîbà bwa wèwè kudìlongolola bwa kulwa mu masangisha awu.”

Mbwena kwamba ne, mu matuku àlwalwà muntu yêyè muswe kumanya ne mmwaba kaayi menemene wutwikalà mwa kwenzela masangisha, tudi benze ndongolwelu kampanda, ku birò kwàka mpindyewu, bwa ne wèwè udi mwa kutèèka anu dîna dyebe cyanàànà kaaba aka ne mwaba wùdi musòmbèlè. Nenku netùkutùminè karta kampànda, kumpala kwa dîbà, bwa wàmanya mwaba wikalà masangisha ènzekela, ne pàmwàpa byena-bwalu, ne cyònsò cìdiku aci, wèwè mwa kupeta mpungà. Nudi numòna's, kwòkù kakùyi mwaba kampànda wà mumanya kùdi bònsò wùdici cìfùmina, ewu wàmba *cikampànda* ne ewu wàmba *cikansanga*, kwèna—kwèna ucipeta to, wamònu's. Pa nanku lekèlè anu... Fùnda dîna dyebe ne mwaba wùdi musòmbèlè ùbitèèkè kaaba aka, nenku Billy Paul neàbyàngatè ne neàbifilè.

<sup>14</sup> Mpindyewu, bàvwa kabidi beelè lukonko, bwa ne nekwikalè kabidi... “Mwaneetu Branham, newènzè makwabo masangisha a dyondopa mu tabernacle, ne dijingulula anyi?” Bwàlà. Bwàlà. Dijingulula nedifidiibwè kùdi—kùdi kasumbù keetu kakwabo. Tudi ne Mwaneetu Neville ewu mpindyewu udi ne dipà dya cipròfetà, yêyè ùdi wènza bipròfetà pa babeedi ne ùbàmanyisha bintu bidibo bàkengela kumanya. Ne tudi ne mwaneetu wa balùme dîna dyèndè n'Higg-... Higginbotham, umwe wa ku... ùvwa mulubuludi, mukwate mudimu ne lulamatu lwònsò mu kasumbù amu. Ncyèna mumumòne mu dinda emu to, kadi pa ciibidilu yêyè ùtu ne dipà dya dyakula dya mu myakulu. Ne inàbànzà mukese dîna dyèndè ng'Arganbright, mwakùnyèètu wa bakàji wa musàngèelu udi ne dipà dya dyandamuna dya myakulu.

<sup>15</sup> Ne miine mikenji eyi mmijaadikùbwe ne nyà kùdi Nzambi, bwalu ncyà bushuwa ne kayitu yipàtukakù mu bulongàmè to, mmitèèkùbwe anu mu bulongàmè. Ne pàkàadi mapà aa àbanga kuvulangana, netùteetè bwa—bwa...kuààlujija mu ekeleeziya, mushindu wà kubyènza. Ne nebikengelè bwa mmonanganè naabò abidi àdi panshi aa, bwa—bwa—bwa masangisha kwikalawù ènjiibwa anu mu bupwàngàne mu bulongàmè bwa Mukalenge, bilondèshile mutùdi mwa kubyènza mu bupwàngàne amu.

<sup>16</sup> Kadi bananga beetu aba, mùdi mwena mutumba naanyi mukàji wàmba, Màdamù Wood, ùdi mupàyike kaacikòloko kaaba aka, ne mukàbà wà mèyi paanyima pàapa, bwa kukwàta bya mu masangisha pa mikàbà ya mèyi, anu mu kiipàcìlè kàa kupeta mikenji ayi, ne kuyifùnda, ne kumòna ní yidi mu yòyi anyì kayèèna mu yòyi. Nwamònu anyi? Ki mùdiye ùyikenketa nanku. Mèmè ntu mumanye ne Màdamù Wood mmukàji wa

meeji matòòke. Ne yêyè ùtu ùngambila bintu byàbúngi bitù byambìlbwe, bìdì byènzekà.

<sup>17</sup> Mpindyewu, pa nanku tudi ne kwanyisha kwàbúngi bwa bwalu abu. Diikisha kaayi dindiku mpeta kwanyi kumbelu's wè! Pàndì ngaalukila kumbelu, díbà adi...Dijingulula dya mu cibadi cya cipròfetà adi ditu dincyòkesha bikole, nenku, ki bwa cinyi, Nzambi wântuminyikù diikisha kampànda bwa bwalu abu, ku cipròfetà, ne dyakula dya mu myakulu, ne diyàndamuna, cìdì ciikàle cipròfetà. Bwalu, kwakula kwa mu myakulu aku, ncipròfetà. Kùdì bantu babidi bashiilàngàne bàdì bàmba cipròfetà. Umwè wákula, mukwàbo ùmwva cìdì yêyè awu wàmba mu myakulu myenyi, ncipròfetà anu cyetu cya menemene eci. Nenku mpindyewu netwikalè...Tudi ne cyòcì aci dituku dyònsò, mu disangisha dyònsò kaaba aka patùdì twenza milongo yetu ya babeedi mu disangisha.

<sup>18</sup> Mpindyewu, kùdì muntu díbà adi udi mufwànyine kukonka, pa...pa bìdì bitàngilà dipà adi. Eyowa, ncìdì anu naadi. Kadi mushindu awu, mushindu wumwepele wùndì nkwata naadi mudimu, ndibà dya miyiiki ya babidi ya pàà nkààyeetù, yintù ngenza ayi. Nenku, bwa kuyipeta, ngeela meeji ne mbadilamike ku mboodi wa mamanyisha paanyima pààpa, bwa kupeta dyanyisha ne kutèekesha díbà dyebe mu bulongàmè, kùdì Billy Paul, mwanàanyi wa balùme awu, bwa kaaba aka anyi bwa masangisha àdì àlon dà edi nunku. Pàndì mpàtuka nya mu madimi a bwambi, mwaba kanà wònsò, wêwè udi ne cya kwikala ne kaakartà kakese aku kùikalà Billy Paul mwa kukupèesha. Kwòkù bwalu kampànda mu nsòmbelu webè bìdì kùyì mwa kuumvwa to, ne kùyì mumanye mwa kupàtukamù, ne mwikàle wenda ukèbangana ne lungènyi lwà Mukalenge, díbà adi lekèlà...Mònanganà ne Billy Paul, mwanàanyi wa balùme awu, yêyè ki mbùtààmyàndà, nenku yêyè ngwàkupèesha kaakartà kakese, ne neàkutèèkèlè dituku dya ngondo, ne díbà kampànda.

Nenku patùdì twenza miyiiki ya babidi ayi, díbà adi aci neciikalè patwàbwelà pamwe, mèmè ne wèwè nkààyeetu. Kadi byòbi ne bakaji mbàdì bàlwa, neùbwelè wèwè ne mèmè ne mukàjàanyi. Nenku díbà adi wèwè...Tudi tujandula, ne tukèbangana ne Mukalenge ne tuMulòmba cyùdì ne cya kwenza.

<sup>19</sup> Mpindyewu, bwa tukwabo tuumaalu twa tukese, ne bikwabo bya mushindu awu, bìdì bifidiibwa kùdì Mwaneetu Neville, ne Mwaneetu Higginbotham, ne Mwaneetu wa bakàji Arganbright, ne bakwabo bàdì bààkulà mu myakulu ne bàyàndamuna, bàdì mu ekeleeziya emu abu.

<sup>20</sup> Nenku, tudi bu bàdì mu lwendu alu. Ngeela meeji ne ùvwa n'Yetèlò, nwamònu's, wákambila Mòsà dینگà dituku, "Twàngatèku ndambu wa bakùlù." "Nenku Nyuma wa Nzambi wàkangaciibwa pa Mòsà ne kutèèkiibwa pa bakùlù makumi mwandamutekète abu, ne bòbò bàvwa bàmba bipròfetà. Kadi

anu bintu bya binène ne bikolè mbivwa biya kùdi Mòsà nkààyendè.” Mpindyewu, twètù katwèna Mòsà to, anyi bôbò aba kî mbakùlù abu to, kadi twètù tucidi anu tukwàcila Yehowah Nzambi awu mudimu, biikàle ne Dikunji dya Kapyà dimwedimwe adi ditùlombola batàngile ku Buloba bulaya.

Pa nanku, dîbà adi, eyowa, nekwikalè makwabo, nekwikalè masangisha ne nekwikalè dyandamun- . . . Majingulula neâlwe. Aci ncyàmpèèshaku mpungà dîbà adi wa kwikala mu disambila ne mu dilonga, matuku ândi mumanye ne ngiikalà miyiiki ya babidi eyi mwa kwenzeka awu, nenku ndilongolola bwa yôyi ayi.

<sup>21</sup> Mpindyewu vùlukàayi ne, Billy Paul Branham, mbùtâamyàndà wetù wa mu budimi bwa bwambi, neikalè . . . Cidi pa . . . Mboodi wa mamanyisha ùdi paanyima pàapa, ncilamika kùdi balubuludi. Ndi kaaba aka ne kantu kafùnda bwa kumanyisha cyôci aci, ne kwambila bantu ne mbafwànyine kucibala ku mboodi wa mamanyisha, mu dipàtuka amu.

<sup>22</sup> Mpindyewu, mpindyewu, mu dinda emu tudi ne dileesònà dinene, ne dilòlò edi netùteetè bwa kutùngunuka naadi. Nenku, bu Mukalenge mwa kwanyisha, mu dyalumingu dilwalwà, dikwabo kabidi, kubwelamù. Ncivwa mumanye ne civwa mwa kwikala cya ndòndò mushindu wàwa to anu pângàditu mu dicilonga apa. Kadi cicidi anu bwalu-busokoka kùndi, ne mpindyewu, ne pa nanku ndi anu ngeeyemena Mukalenge.

<sup>23</sup> Mpindyewu, nwènù bàdi ne Bibles yenu abu, tùbuululàayi mu Misambu 99, 99. Nenku nêmbalè mvensa wa kumpala, disangisha dîbala mvensa mwi2, pashiishe bônso pamwe netùbalè mvensa wa ndekeelu. netùtungunukè nanku; mêmè, wa kumpala awu; disangisha, mwi2; mêmè, mwi3; disangisha, mwi4; too ne ku mvensa wa ndekeelu, ne pashiishe netùmubalè bônso cyàpàmwè. Tùjuukilàayikù kuulu patùdi tubala Dîyi dya Nzambi apa.

*MUKALENGE ùdi ùkòòkesha; bantu bàzakalè; yéyè mmusòmbe munkaci mwa bakèlùbà: buloba bùtenkakanè!*

*MUKALENGE udi munene mu Siyònà, ne yéyè ùdi kuulu kumutù kwa bantu bônso.*

*Bàtumbishè dîna dyebe dinene ne dîdi dikwàcishà bwòwà, bwalu ndyà cijila.*

*Dikàndà dya mfumu dîtu kabidi dinangè dilumbulwisha; wèwè udi ujaadika bujaalame, wèwè udi wenza dilumbulwisha ne bwakane mu Yakòbò.*

*Zàngikàayi MUKALENGE Nzambi wetù, ne kuukwilaayi ku citèekedi cya makàsà èndè, bwalu yéyè ngwa cijila.*

*Mòsà ne Aalònà munkaci mwa baakwidi bèndè, ne Samwèlè munkaci mwa aba bàdi bàsòka dîna dyèndè, bààkasòka MUKALENGE, ne yéyè wàkabàdamuna.*

*Yèyè wàkaakwila naabo mu dikunji dya ditutu. Bòbò bàakalama majaadiki èndè, ne mikenji yàkabàpèèshàye.*

*Wèwè wàkabàndamuna, Éyì MUKALENGE Nzambi wetù; wèwè uwua Nzambi wàkabàfwila luse, nansha muwàkadìsombwelà ku bilèmà byàbò.*

*Zàngikàayi MUKALENGE Nzambi wetù, ne kuukwilaayi mu kakùnà kàà cijila. bwalu MUKALENGE Nzambi wetù ngwa cijila.*

24 Twinyikaayi mitu yetu.

Bulelèlà, Mukalenge, Mèyì aa mmáfùnda ne kasalà kùdì musadidi Webè, Davidi, mu Musambu muKwimbila Wèwè. Wèwè udi cya bushuwa musòmbèle munkaci mwa Bakèlùbà. Wèwè udi wa cijila, ne kakùnà Keebe nkàà cijila. Enzàku bwa tuseemenè ne myoyi misanshila Mashi a Mukalenge Yesu, biikàle ne kondò kàà mwoyi katòòke, ne diitabuuja ne ditwishiiibwa dya ne tudi tubwela mu Bwikadi bwa Nzambi wetù. Batèeleji bònso aba mu dinda emu biikalèku ne kaneemu. Jikulàku macì ètù a luumvu. Akwilàku kutùdì, mu lungenyi, bwa twamònakù mwa kumanya mutùdì ne cya kudìtwàla mu matuku aa ne mu Bwikadi Bwèbè.

25 Tudi baswèku kuKulòmba, Nzambi wetù, bwa kutùbuulwilakù bintu bisokòme ebi bitù bisokoka mu bidimu byònsò ebi, patùdì tuseemena ku dimwe dya ku Mèyì a matàmbe kwikala a meeji matòòke, a bujitu edi. Wèwè wàkacyàmbe paÜvwà pa buloba apa, wamba ne: “Ewu udi ubala, ùmvwè.” Pa nanku, tudi tulwa mu mushindu mutàmbe kwikala wà ne ngàsà yònsò Kùdì, Mukalenge, ne tukèba lungenyi Lwèbè, katùyì anu bamanyè ciine cìdì cìkèngelà kwamba to. Ndi mulongòlòle ndambu wa Mifùndù kaaba aka, ne disù dikolè mwikàle mutèèkèle mwoyi wònsò Kùdì bwa dyandamuna, katùyì ne kàngà kiipàcìla to anu bwa twamònakù mwa kumanya dìbà ditùdì ne mwoyi, bwa twamònakù mwa kwikala bàdìlongòlòle bwa bintu binènè bidì bisanganyiiibwà kumpala eku. Kwènàku Muswe bwa kutwènzèlacì anyì, Mukalenge? Mu Dìnà dya Ewu Utu mutùlongèshe bònso ne tudi ne cya kusambila nunku ewu:

Taatù wetù udi mu Dyulu, Dìnà Dyèbè dījidiibwè.

Bukalenge Bwèbè bùlwe. Diswa Dyèbè dyènjiibwè pa buloba, mùdìdì dyènjiibwa mu Dyulu.

Tùpèèshèku leelu ewu cyàkudyà cyètù cya bwàcyàbwàcyà.

Ne tufwilèku luse ku matomboka ètù, mutùdì pèètù tufwila luse aba bàdì bàtwènzèlà matomboka.

Ne kùtùlombolùku mu mateeciibwa to, kadi utùsungilèku ku bubì; bwalu Bukalenge

mBwèbè, ne bukolè, ne butùmbi, bwa kashidi. Amen.

26 Sòmbaayi. Mpindyewu, yònsò wa ku bantu balùme yèyè muswe kukòpola kàzakù, adyùmfwè anu mudilekèlèlè. Ne aba bàdì biimàne kuulu lwà—lwà ku bimanu, makàsà ówò mabangè kunùsaama, mòna's, nùdyùmfwè anu badilekèlèlè bwa kupàtukakù pambelu.

27 Nenku mpindyewu, ndi ngeela meeji ne, bânà batekète bôbò baswe kuya ku bibambalu byàbò, anyi bàkaadi babàtangàlèje anyi? [Mwaneetu Neville ùdi wàmba ne: “To, kabèena mwa kucyènza to. Katwèna mwa kucyènza mu dinda emu to, bwa búngì bwa bantu.”—Muf.] Mpaasàtà ùdi wàmba ne musùmbà wà bantu mmupàte mu bibambalu amu, mu mushindu wa katùyikù mwa kwenza kalaasa kàà Dyalumingu bwa bânà bakeke to. Nenku tudi bafwànyine kwikala ne disànka bu nwènu bânà batekète aba mpindyewu mwa kudisangakù neetù mu mudimu, bu mùdìbi ne mu dinda emu, tudi tubanga Diyiiisha dinene, dilenga dya dikema dindi ngeela meeji ne nediiikalè dya mushinga wàbúngì kùdì tatwènu ne mamwènu, ne kùdì bananga bèènu bàdì kaaba aka, ne nansha kunùdì nwènu bânà batekète. Pa nanku, tudi tudilenga ne kaneemu kààbúngì.

28 Bu Mukalenge mwa kwanyisha, mu dinda emu tudi twangata cyena-bwalu cya mbingu makumi mwandamutekète ya Danyèlè. Nenku mu dinda emu tudi twakula pa Danyèlè mu bupika, ne Ngabùdyèlè ùpaapala ùbwela kùdìye bwa kumupèesha dileeja dya njila pa matuku àcìvwà àlwa. Pàvwà Danyèlè mu disambila, Ngabùdyèlè, Mwanjelo awu, kubwelayè bwa kumupèesha dileeja dya njila.

Dilòòlò edi, ndi muswe kwakula pa twipàcìlà tusambombo twa dimumwènekela Dyèndè, byena-bwalu bisambombo bishiiàngàne bidì bikèngelà kutwàla dilòòlò edi, cìvwà Ngabùdyèlè muvwilè.

29 Mu dyalumingu dilwalwà edi, bu Mukalenge mwa kwanyisha, ndi muswe kutèeka kabingilà ne cikondo cya Bikondo Mwandamutekète Bya Ekeleeziya, ne ncikondo kaayi cìdìbi, ne mmwaba kaayi wutùdì biimàne leelu ewu. Aci mmu dyalumingu dilwalwà edi mu dinda, bu Mukalenge mwa kwanyisha.

30 Mpindyewu, kabingilà kàà cyôcì eci. Mvwa mulwe ne tuubintu tukese tufùnda twa ku Mayiisha àànyì a musangu mushààle. Kadi mu dinda emu ndi muswe bwa kutùlamakaja, bwalu eci cìdì pa mikàbà ya mèyi yikalà mwa kuya pa buloba bujimà, mu matunga àbúngì. Ne, misangu yònsò, cìdì cyènza ne ngiiikalè ngaalukila cyànyimà, mbwalu pàmwàpa muntu mmufwànyine kutèeleja mukàbà wà mèyi awu bwa musangu wèndè wà kumpala, ne mufwànyine kubènga kuumvwa cìmwà njinga kwamba pàndì ndeedila ku cintu cikwabo kampànda.



<sup>31</sup> Twenjì mpindyewu ngondo ne ngondo mu dilonga dya Mukàndà wà Bwàkabuulwibwà, Dibuuuludiibwa dya Yesu Kilisto. Twàkenkèci e kujikija bikondo bya ekeleeziya. Nshapita yisatu ya kumpala ya Bwàkabuulwibwà yivwa mbikondo bya ekeleeziya. Pashìishe Yone kwangaciibwayè muulu mu nshapita mwi<sup>4</sup> ne mwi<sup>5</sup>, ne bààkamuleeja bintu bivwà—bivwà ne cya kulwa paanyima. Mpindyewu, mu nshapita mwi<sup>6</sup>, ùdi ùtùùluka cyàkàbìdì pa buloba, bwa kumònayè bintu bivwà byènzeka kuumukila ku nshapita mwi<sup>6</sup>, mvensa wa kumpala, too ne ku nshapita wa 19 ku mvensa wa 21. Mwômò emu mmùdi mùlwa Bitampì, Bipùpù, Makènga, mikùmbì ya lokùsètà, mu—mukàjì mu dîbà, ne diipata dya dragon mukünze, ditwibwà dya citampì dya binunu lukàmà ne makumi anaayi ne binaayi, ne bintu byònsò ebi.

<sup>32</sup> Elu lùvwa lumingu lwà dilonga dinènaanènààlè. Makeelela awu, dituku dijimà, bivwa bikolè bwa mèmè kupàtùkekù mu birô, nteeta anu bwa kulonga. Ne ncintu cya musangu mushààle, bààbùngì bàà ku bantu beetu bàà kale kaaba aka, cìngààkalongeshà, ngamba anu ne: “Mwômò emu mmùdi mbingu makumi mwandamutekète ya Danyèlè,” kadi ncìyi nteetakù kucibùndula to, bwa kucyùmviwija. Kadi bwa ewu musangu kaayi, ku ngàsà wa Nzambi, ndi mwangàte dipangadika dya kuteeta kulòmbakù ngàsà kumpala kwa Nzambi, bwa ngaamònakù mwa kucitwàdila bantu. Ne mwômò emu ndi nsangana bintu bìndì ncìyi mumanye kantu pa byòbì to.

<sup>33</sup> Nenku, dîbà adi, ndi—ndi mubale mukàndà wà Docteur Larkin, mukàndà wà Docteur Smith, tuntu tufùnda twa Docteur Scofield, mèyi mashiilèshiiàngàne a nsèka a kùdì bantu bàà myaba yònsò, kadi ncìyikù anu mwanjì kukùmbana mwa kutèeka byàbò abi kaaba kàmwè bwa kupàtulakù cintu cijaalàme to. Nwamònu anyi? Pa nanku, elu lumingu ndi ndongolola, mvwa muyè kamònakù nzubu wa disombeshilangana mikàndà mu Kentucky, bwa tùmwe twa ku tubala-matuku ne bikondo pa dilonga dya mabulunga dya kalekale, nenku mèmè kutwàngatakù ndambu mu nzubu ya disombeshilangana mikàndà, ne bikwabo, mikàndà ya kalekale yònsò yìmvwàku mwa kupeta ayi, ne kàànyi pàanyi kakese kàndì mwa kwenza aku, ne mwikàle mutèèke dyeyemena ne disù dikolè dyònsò mu Yesu Kilisto bwa kucìmbuulwila.

Bwalu, ncyèna ncikèba bwa mèmè kwamba ne: “Ndi mumanye *cikampànda*, ne ndi mumanye *cikansanga*” to. Yèyè mmumanye mwoyi wànyi. Yèyè mmuntèèlèje. Kadi ndi ncikèba, mbwa ngaamònakù mwa kukenkeshila cisàmbà Cyèndè, ki bwa cinyi ndi mwitàbùùje ne Yèyè neàcimpèèshè. Ncyèna anu mwanjì kumanya to, kadi ndi muMwèyèmène Yèyè bwa dyalumingu dilwalwà, bwalu cyòci aci ki ciikalà citùpà cya cilenga menemene, dyalumingu dilwalwà, bwa kumanya ne kutèeka mbingu makumi mwandamutekète ayi pa kaaba kàayi.

<sup>34</sup> Lwônsò lùdi ne kaaba kashiilàngàne. Ne paùdi wenza nanku, paùdi uyëndesha too ne kundekeelu, kayèèna yipátuka mu mushindu mujaalàme to, kayèèna yidíleeja bímpè to. Mbikole. Nenku, ki bwa cinyì, bìdi mwa kwenzeka ne mèmè—mèmè mpangè mwa kuyitèeka bímpè, kadi nengèyemenè Mukalenge bwa bwalu abu.

<sup>35</sup> Nenku ndi mvùluka Solòmò musangu kampànda pàakasambilàye ùlomba Mukalenge Nzambi ní Ùvwakù mwa kumupèesha lungenyi, kalùyi bwèndè yèyè mwine to, “kaciyi dimuvudijila dya matuku, kaciyi dimuleepeshila dya matuku a mwoyi, kaciyi bwa byúmà to,” kadi bwa wàmònakù mwa kupeta lungenyi lwà kumanya mwa—mwa—mwa kulumbulwisha cisàmbà cya Nzambi. Ki Nzambi kutwàYè disambila adi mushinga, ne kupèeshaYè Solòmò lungenyi alu, bwalu lùvwa bwa cisàmbà Cyèndè. Nenku ki bwa cinyi mèmè ndi ndòmba bwa Nzambi àmmanyishèku cìdi mbingu makumi mwandamutekète eyi yùmvwija, bwalu ndi mumanye ne ki kabala-matuku kàà menemene bwa cikondo citùdi ne mwoyi eci. Nenku, ki bwa cinyi, ndi muswe kubìmanya; kabìyi bwànyì mèmè mwine to, mèmè ndi. . . kabìyi bwànyì mèmè mwine to. Mu bushuwa bwa bwalu, ndi muswe kubìmanya pàànyì. Ncyèna mèmè ncyàmba mu mushindu awu ne: “Kí mbwànyì mèmè mwine” to, bwalu ndi cya bushuwa muswè kubìmanya bwànyì mèmè mwine. Ndi muswe kumanya, bwalu ndi muswe kumanya mwaba wutùdi ne mwoyi ne dībà ditùdi ne mwoyi. Ne, pashiishe, ndi mumanye ne cyôci aci cyàkafidiibwa.

<sup>36</sup> Ne bantu bashiilàshilàngàne bàtu badìfwànyikijileci, ne bàakacitèeka mu matuku a kale. Muntu kampanda, pàmvwà mbala, wàkenza ne byònsò abi byàkajika mu cidimu cya 1919, mbingu makumi mwandamutekète ayi. Ee, kabìvwa nanku nansha.

Nenku, paanyima pàà mbingu makumi mwandamutekète, paanyima pàà mbingu makumi mwandamutekète, byònsò mbijikè. Nenku twètù—twètù katwèna. . . Twètù tudi baswe kumanya Bulelèlà. Ne ndi ndòmba bwa Nzambi ampèeshèku Bulelèlà.

<sup>37</sup> Mpindyewu, bwa kutwà cyôci eci nyama ku mikolo, kwalukilakù paanyima, ndi muswe kwambululakù ndambu bya paanyima abi. Nenku, ki bwa cinyi, tùmwe tuntu tùmvwà mufunde, tutùvwà bamòne mu nshapita mwi5, mwi4 ne mwi5 atu, bwa bantu bààmònakù mwa kuumvwa. Dyambedi, kumpala kwa twètù kwenza cyôci eci, ndi muswe kubilamakajakù, bwa nwènù kuumvwa kubangila ku mwi4. . .

Mpindyewu, vùlukàayi ne, nshapita mwi3 ùvwa n’Cikondo cya Ekeleeziya wa Laòdikiyà, ne Ekeleeziya wàkambwibwa kundekeelu kwa Laòdikiyà.

<sup>38</sup> Mpindyewu, mvwa nteeta kuumvwija mukàjàànyì cintu kampànda pa bwalu abu. Mvwa ne Becky, mwanàànyì wa bakàjì, mwikàle ne mishindu mishìilàngàne yònsò ya nkòngamyakù ne bikwabo bitùvwà mwa kupeta abi. Kayiyikù yifila dyandamuna to. Mémè kwangata nkòngamyakù wa Bible. Mémè kwangata nkòngamyakù wa cyena Ngelikà cya kale. Mémè—mémè kwangata wa—wa Websters ne ya bakwabo bààbúngì, nkòngamyakù ya cyena-leelu. Nansha umwe wa ku yòyì kàvwa nansha mufwànyine kupeta. . . kufila myaku anyi dyandamuna to, nansha bishi.

<sup>39</sup> Mukàjàànyì kwambayè ne: “Mmunyì mùdì utèkemena ne bantu beetu twètù, bàdì bapèlè aba, ne bààbúngì kabàyi balongè kalaasa to bu twètù kùnu, bwa kuumvwabò cintu bu cyòci aci?”

Mémè kwamba ne: “Nzambi ngwafila dyandamuna.”

<sup>40</sup> Nansha ciikàle cikòdyakànàngàne munyì, Nzambi ùdì mwa kucisùnsula ne kucipeepeja. Bwalu twètù tudi. . . ndambu wa bantu bàdì bàjinga bikolè, bàsambila bwa dituku adi ne dîbà adi abu. Ne mèsù ètù mmatàngija ku Dyulu, ne tudi bindile Dilwa Dyèndè. Ne mémè ndi anu mutwishùibwe ne Yèyè neàtùleejè. Mpindyewu, kacyàkutwàmbila dituku anyi dîbà to, bwalu muntu nansha umwe kààkumanyakù aci to, kadi ncyà bushuwa ne necitwàmbilè dituku dya lumingu ditùdì ne mwoyi, bu twètù anu mwa kucipeta.

<sup>41</sup> Mpindyewu, mu nshapita mwi4, Yone wàkambwibwa dyàkàmwè, paanyima pàà Ekeleeziya. Yone, pàakabàndàye, wàkamòna cikondo cya Ekeleeziya cyònsò cijimà. Ki mwaba wùndì muswe kwimanyina ngwòwò awu, katanci kakese cyanààna, bwa kwamba, ne: bantu bààbúngì bàdì bindile bwa cintu kampàndà cya cinène, cinènaanènààle, cya bukole kwenzekaci, mu cikondo cya Bisàmbà bya bende abu, mbatùpàkàne anu cya bushuwa. Cikondo cya Ekeleeziya, ne byònsò byènzekà mu bukòokeshi bwa bàà Bisàmbà bya bende abi, mbalonde bwalu bwàbì kuumukila ku Bwàkabuulwibwà 1 too ne ku Bwàkabuulwibwà 3, mukùmbajilakù. Pashìishe Ekeleeziya wàkambwibwa ne kwangaciibwa muulu, ne bikwabo ebi, too ne ku nshapita wa 19, mbidì byènzekelà cisà cya beena Yudà, paanyima pàà Ekeleeziya mumane kubànda. Ne ncikondo cya Dikènga dinene, cintu nansha cimwe kacyi cyènzeka munkaci mwa bàà Bisàmbà bya bendè nansha; anu dishebeyangana, ne bikwabo, mutwikalà mwa kufika ku cyòci aci ne kumòna.

<sup>42</sup> Kadi Ekeleeziya, Yèyè mwine, mmuye mu wa 13. . . Mu mvensa wa ndekeelu wa nshapita mwi3 wa Bwàkabuulwibwà, pàajikà Cikondo cya Ekeleeziya wa Laòdikiyà, cìvwà cya ndekeelu aci.

<sup>43</sup> Nenku tudi bangàte cikondo ne cikondo cya ekeleeziya, musangu wònsò, cintu cyònsò cidi cyènzèke, mutooto wònsò,

mùsànjeelà yònsò, ngiikàdilù wendè, cidiye mwenzè, ne tudi bendè naabi anu mu maalu-malonda too ne ku cya ndekeelu, cyàkazòdiibwà pa dizòlà pààpa mene, ku luseke lwà cimanu. Ne patwàkajikijà, Nyuma Mwîmpè kubwela e kwenzaYè cijèngù cya cintu cimwecimwe aci ku cimanu, ne kutùbuulwilaci bònsò Yèyè mwine kaaba aka.

<sup>44</sup> Mpindyewu, mu kwenza kwa nanku, ndi mutwishiiabwe ne, kundekeelu kwa cyòci eci Yèyè nealwe ne cintu kampànda cya cinènaanènàalè ne neatùleejè cyàkàbìdì ne tudi ku cikondo cya nshiiکیدیلو.

<sup>45</sup> Mbanganyi bàà kunùdi aku bàvwà batèèlèje Kennedy... muiiki wa Mfumu Kennedy, mèyi a dyela nsèke ne bikwabo? Mbanganyi bàvwà bumvwè bwalu bùvwà budyànjila kwamba abu, bwamba ne patwàmbà kufika mu dituku dimwe dya ngondo wa kumpala, budyànjile kwamba ne ne États-Unis ne Russie bònsò nebàshaalè butù bwa volcan? S'ki cyònsò cidi citùkèngela. Dìbà dikaadi dipite kutàmba mutùdi twètù twela meeji. Nwamònu anyi? Nenku, piikalàbi ne tukàadi pabwìpi mu mushindu wa ne nansha bantu bàà pa buloba ebu bàkaadi bàdyànjila kwamba ne cintu cinènaanènàalè eci necyèzekè, s'mbîmpè bwa twètù kwikala batàpe ntàalà badimùke's, kantu ne kantu kalongolola, maalu ònsò matonda, byònsò bilongolola, bwalu katwèna bamanyè ne ndìbà kaayi menemene dyàtùbiikilà Mukalenge wetù to. Ne pènzàYe dibiičila ne: "Bàndaayi kuneeku," s'mbîmpè kwikala badìlongòlòle. Ne dyòdi nedilwe pa dîbà dyùdi kùyi welela meeji to.

<sup>46</sup> Ditàbuluja dinene dya beena Mpenta dikaadi mpindyewu dyènda dijika. Tudi tucimòna myaba yònsò, nkwaka munene wa ndekeelu awu. Mukenji wùkaadi mupàtùke. Byònsò bikaadi pabwìpi mpindyewu, bindile. Ekeleeziya ùkaadi mutwibwe citampì. Beena lwonji ki kutàmbabò kulwa ne lwonji eku. Ekeleeziya ki kutàmbayi kushààla ne mmwènekèlu wa cyena ekeleeziya aku. Bansantu ki kutàmbabò kwenda kuseemena pabwìpi ne Nzambi eku. Mapà a Nyuma ki kubangawù kuvulangana mu tusùmbù tukese eku. Tudi ku cikondo cya nshiiکیدیلو. Kaa, ndi munange musambu wutùvwa twimba kale wàwa mu ekeleeziya awu.

Ndi mwindile dilwa dya dituku dya disànkà  
 dya Bukalenge bwa bidimu cinunu adi,  
 Dyàlwà Mukalenge wetù mubènesha  
 kwangata Mukaj'Èndè-musèla udi mwindile;  
 Kaa, mwoyi wànyi wùdi wùdila, mwikàle ne  
 nyòòtà ya dituku adi dya disùngidiibwa dya  
 mu kalolo,  
 Dyàlwà cyàkàbìdì Musùngidi wetù pa buloba.

<sup>47</sup> Bindile dîbà adi's wè! Mpindyewu, mu nshapita mwi5 ku mvensa mwi5, tudi tusangana, mu dileesòna dyetu didi didyànjile ne, tuvwa baakùle pa Cilongo Cipikudi, utùvwà

basangàne ne ùvwa n’Kilisto. Tuvwa bacifwànyikije ne Luutà: Luutà wàngata dipàngadika; Luutà ùkwàta mudimu; Luutà wikisha. Wàngata dipàngadika, cìvwa ndibingishiibwa; ùkwàta mudimu, ùdìlongolola, ndijidiibwa; wikisha, cìvwa ne Nyuma Mwímpè, too ne pàakalwà Didya dya Dibanjì. Bilenga be!

48 Ekeleeziya mmupìcìle ku John Wesley, dibingishiibwa, anyì. . . Martin Luther, dibingishiibwa; mupìcìle ku John Wesley, dijidiibwa; ku beena Mpenta, dibàtiiza dya Nyuma Mwímpè; ne mpindyewu, wikisha, mwindìle Dilwa dya Mukalenge Wèndè. Menemene’s!

49 Cilongo cyetu Cipikudi, bakùlù bàvwa babingè pàakaMubùkilàbo ne m’Mwànà wa mukooko, pabwìpì ne kulwaYè Ntambwe, bu mulumbulwishi. Yèyè ùvwa Mwànà wa mukooko, nudi bamanyè’s, mwikàle ne Mukàndà wà bitampì mwandamutekète. Pàakangaciibwà Mukàndà awu, mudimu wà butwàngaji wàkajika.

50 Mpindyewu, mu nshapita mwi3, Ekeleeziya wàkabànda, kadi mpindyewu bikèngela bwa bupikudi bùbuuludiibwè, mwàkapikudiibwà—mwàkapikudiibwà Ekeleeziya, dibuuludiibwa dya cyàkenzekà munda mwa cikondo cya Ekeleeziya. Nwamònu’s, Ekeleeziya mmuye, pa nanku Yèyè ùdi ùleeja mpindyewu, mu nshapita mwi5, mwàkacyènzàYe, cìvwa cyenzèke, mùvwàYe ntwè Èkeleeziya citampì. Dibuuuludiibwa dya Dìnà Dyèndè; dibàtiiza dya mu màyi, bàsòka Dìnà Dyèndè; Mwoyi wà Cyendeleele; kakùyi iferno wa Cyendeleele to; dimiinu dya nyòka; dikùbiibwa dya Cyendeleele; malongesha ònsò manene awu, didyànjlila-kulongolola dya Ekeleeziya mbibuulwila Ekeleeziya. Udi ùleeja mwàkabyènzàYe.

51 Mpindyewu, bàpèèshi Cilongo cyetu mu byanza Mukàndà wà Bupikudi mutwà bitampì mwandamutekète kùdì Mwena cintu wa ku cibangidilu. Amen! Nganyì, mutùdì tusangana, uvwa Mwena cintu wa ku cibangidilu awu? Nzambi Yèyè mwine. “Nenku Mwànà wa mukooko wàkalwa ne wàkangata Mukàndà mu cyanza cya dyàbalùme cya Ewu uvwa musòmbe pa Nkwasa wa butùmbi.” Uvwa Mwànà wa mukooko nganyì? Mupikudi, Cilongo cyetu Cipikudi, Cilongo cya Ekeleeziya, Wàkalwa ne kupikula Izaleela awu.

52 Mpindyewu netùbwelè mu cyòci aci mu dinda emu. Izaleela wàkapikudiibwa, kadi kacyàkangaciibwa bwàbò bôbò to, bwalu bôbò bàakaMubènga. Kadi, Ekeleeziya wàkaakidila bupikudi bwàbò abu, nenku Yèyè ùdi Cilongo Cipikudi cyetu twètù. Mùvwàbi bikèngela ne Boàzà àpikulè Naòmì, bwa kumònayè mwa kupeta Luutà, mwena Moàbà awu, mwenyi, wa bàà Bisàmbà bya bendè, bya mwomùmwe kabidi Kilisto wàkapikula Izaleela, mwenze bupikudi, kadi kubèngiibwaYè.

53 Nudi nuvùluka difwìdiibwa dya luse, dya muntu wàkaashiibwa cingoma awu, dintù misangu mikwabo ndonda

adi anyi? Mu cikondo cya mvita ya beena ditunga, pàvwà... Yèyè ùvwa muntu mwimpè. Kàvwa mwenzè bubi to, kadi kumukwàtabò ne dipiila. Nansha nanku, ùvwa mupiile mu mushindu kampànda, wà ne wàkanyeema díbà dya mvita minunkè. Ki kumukwàtabò ne dipiila nenku bàvwa ne cya kumwasa cingoma. Kadi muntu kampànda kuyayè kùdì Mfumu wa ditunga Lincoln e kumwambilayè ne: “Mukalenge Lincoln, muntu ewu mmwena Kilisto. Cìdiye ùvwa muumvwè bwôwà. Nsongaàlùmè ewu, mèmè ndi mumanye fàmiyè wabò. Cìdiye ùvwa muumvwè bwôwà cyanààna. Kàvwa ne meeji a kwenzelangana bibi to. Kunyeemayè.” Yèyè ne: “Mukalenge Lincoln, bwalu bùdi mu byanza byebe wèwè. Anu wèwè ki udi mwa kumufwila luse.”

Mukalenge Lincoln kwambulayè kabeji ne kasàlà kèndè kàà màyi a mukàndà, kutwayè cyàlà ne: “Ngàfwìdi *Kampanda* ewu luse. Abraham Lincoln.”

Kwalukilayè lubilu ku bùlokò aku, kwambayè ne: “Ndyòdì edi. Mèmè ngàakupetèdi difwidiibwa dya luse.”

<sup>54</sup> Kadi muntu awu kwambayè ne: “Ndi mubènge bwa kucitàngila. Cìvwakù ne cya kwikala ne citampì cinène citwàpu. Cìvwakù ne cya kwikala cintu kanà cyònsò. Cyùdì udi anu uteeta kumvwija kadingidingi kàà kusekabò. Awu kî ng’Abraham Lincoln to. Muntu kanà yònsò ewu’s mmufwànyine anu kutwà cyàlà cya dìnà dyèndè adi. Kadi cìvwakù mwa kwikala cishindika kùdì citampì cyèndè yèyè, ne bikwabo, bu cyòci cifùmuna kùdiye.” Kadi muntu awu kumutwishishayè; nansha nanku muntu uvwa mu bùlokò awu wàkeela anu meeji ne awu ùvwa wèla bilèlè, ki awu pèndè kuumukaye’s.

Pàakacyàbu mu dinda, bumba bàmwasa cingoma. Nenku pashìishe paanyima pàà bamanè kumwasa cingoma, pashìishe kulwakù dilumbulwisha dya cilumbù ku tubàdì twa cìsangànsàngà, bwalu Abraham Lincoln, mèbà makumi abidi ne anaayi kumpala kwa muntu awu kwashiibwayè, ùvwa mutwè cyàlà cya dìnà dyèndè ne muntu awu ùvwa mufwidiibwe luse. Kadi pashìishe mbùlâmàtadì kumwasaye cingoma, nansha nanku. Ncinyi díbà adi? Díbà adi ki tubàdì twa cìsangànsàngà twa États-Unis, kwambatù, kwangatatù dipàngadika edi dya tubàdì twa Cìsangànsàngà kwambatù ne: “Luse kalwèna luse to anu lwakidiibwe bu luse.”

<sup>55</sup> Nenku Yesu wàkapikula Izaleela ku Kalvariyo. Kadi kacìvwa luse kùdìbo to, bwalu kabàakalwàkidila bu luse to. Kadi, mu dileesònà dyetu mpindyewu pa mbingu makumi mwandamutekète eyi, tudi tusangana ne bàdi bàalukila ne bàakidila luse lwabo. Kadi, Yèyè wàkapikula Ekeleeziya, díbà adi tudi bafwidiibwe luse bwalu tudi baakidile Mashì a Yesu Kilisto bu luse lwetu.

56 Mpindyewu tudi tusangana ne Yèyè ùvwa Cilongo Cipikudi cyetu, ne Wàkangata Mukàndà mu cyanza cya Mwena cintu wa ku cibangidilu awu. Mmukànda wà bwena-cintu wà bupikudi. Tudi basangàne nanku. Nudi bavùlùke dilonga adi anyi? Mmukànda wà bwena-cintu wà bupikudi. Mmukànda wà bwena-cintu mulelèlè wà kawùyì dyela mpatà, wà ne Nzambi wàkalòmba mwoyi bwa lufu, mu budimi bwa Edènà. Pashiishe, Yesu, Mwakàne awu, wàkafwà ne wàkangata mukànda wà bwena-cintu, ne ùvwa mukùmbàne bwa kulamuna Bitampi, kubuulula bìvwà munda mwàBì; ne kufila bumpyànyì, bìvwà Bwèndè abu, kùdì bantu Bèndè. Mwoyi wà Cyendeleele, wàkapyànàYe ku dyanza dya cyòcì aci awu, Yèyè wàkaaluja Mwoyi Wèndè Yèyè mwine, ku Kalvariyo, ne wàkatwàbanyinawù ku Nyuma Mwímpè. Amen! Muntu nansha umwe (kacyapù) kàtukù mwanjì kukùmbana nansha mwa kufika bwa kwela meji a dinanga divwà ciine aci to, cyàkenzàYe aci!

57 Sàtaanà, yèyè ukàävwa ne cintu mu byanza bwa cibulà cyàkenzèkà mu budimi awu, mmuswikiibwe ne mwediibwe mu Dijiba dya Kapyà. Èndè matuku mmamanè kujika.

58 Yesu, mu Evanjeeliyo, ùvwa ne myànzù yinaayi. Tudi bakwàte aci. Mwànà wa Davìdì, mupyànyì wa Nkwasa wa butùmbi; Mwànà wa Abraham, bukòokeshi bwa bukalenge; Mwànà wa muntu, mupyànyì wa buloba; Mwànà wa Nzambi, mupyànyì wa bintu byònsò. Bukòokeshi bwa bukalenge!

59 Mu Dipungila Dikùlukulu, cintu kacivwa mwa—kacivwa mwa kutungunuka kabidi ne kulamiibwa bidimu bipite pa makumi ataanu nansha. Kacivwa mwa kuumushiibwa kùdì mwena cintu wa ku cibangidilu to anu munda mwa bidimu makumi ataanu. Nenu mu dituku dya makumi anaayi Yèyè wàkafuta mushinga. Mu dituku dya makumi ataanu, bupikudi ne bukole bìvwà bya Ekeleeziya abi, byàkajimijiiibwà mu budimi bwa Edènà abi, byàkaalujiibwa ku bupikudi, ne byàkatùmiibwa kutùdì ku dibàtiiza dya Nyuma Mwímpè, mu dituku dya makumi ataanu.

60 Ki pashiishe twètù kwangata eci, mukànda muvùnga awu. Twètù kwangata mikànda mivùnga, mushindu wàkaffidiibwà mukànda muvùnga ewu mu cyanza Cyèndè. Mushindu wùvwà Yelèmiyà, mu Yelèmiyà 32.6, mwanààbò wa tatwèndè mukwabo, Hanàmèlèlè, ùvwà mumushiile bumpyànyì kampànda. Ne bòbò bàvwà bàya mu bupika. Bìdì ne, tudi tubwelamù, pàmwè nendè, mu dinda emu: mu bupika abu. Nenu bwàkalamiibwa mu dibùngù dya buloba; bileeja ne mmwaba kaayi wùdì bukole bwa Nzambi, ne mikànda mivùnga ne maalu masokòmè bya Nzambi, bìmanyikila, mmu mwoyi. Ndongamu wetù wa bupikudi awu, umwèumwè awu mwikàle mulamiibwe mu mabùngù a buloba, Dìnà dya Yesu ne dibuulula.

61 Tudi tusangana ne cyòcì eci civwa cikànga ne Bitampì Mwandamutekète, ne Citampì cyònsò civwa civùngiibwe munda.

Ne pàvwa dibuulula dilwa, Yèyè ùvwa ùkòka Citampì, ne ùkùtulula eci ne ùbala cìvwà Citampì aci cyàmba. Pashiishe Ùvwa ùkùtulula cìvwà cìlondà, mukàndà muvùnga awu, ne ùbala cìvwà Citampì aci cyàmba. Ùkùtulula cìvwà cìlondà, ùcikòka ùcìpàtula ne ùmòna cìvwà Citampì aci cyàmba, ne cìvwà dibuulula adi. Ki cyôci aci menemene cìvwà Bitampì byetu Mwandamutekète abi, mùtwàbwelà katataakà, mutùdi batwishùbwe, ki cyènzàbi. Citampì cyònsò, pàdici citùdiibwa ku Mukàndà awu, necìvunguludiibwè, ne aci necileejè anu menemene cìdi cyènzèke.

62 Tudi tusangana ne kùdi “mwandamutekete,” itaanu mu ndongamu wa bupikudi. Itaanu ki nombà mwine. Ne kùdi myandamutekète yitaanu: Bitampì Mwandamutekète, Nyuma Mwandamutekète, banjelo mwandamutekète, Mpungi Mwandamutekète, ne bikondo mwandamutekète bya ekeleeziya. Pa nanku, nudi numòna’s, myandamutekète yitaanu ayi yidi ngàsà. Itanu ùdi ngàsà, ne mwandamutekète ùdi bupwàngàne. Pa nanku bìdi byènda anu mu bupwàngàne anu menemene, nwamònu’s. Eyo.

63 Bu mùdi, Citampì cyònsò cikàngula mu Dîyi dya Nzambi, cìdi cìbuulwila muntu wa cikondo aci ne, ncikondo kaayi citùdi ne mwoyi, nyuma wa cikondo aci, ekeleeziya wa cikondo aci. Bwàkabuulwibwà 10, ku ndekeelu, tudi tusangana ne pàakakàngudiibwà Citampì cya ndekeelu, tudi tusangana Mwanjelo mwimane ne dikàsà dimwe pa buloba, ne dikwabo pa mbù, ne byanza Byènde byela muulu bitàngija mu Dyulu, ne mwanzankòngòlò kumutù Kwèndè, ùdicìpa mu dîna dya Ewu udi ne mwoyi kashidi ne kashidi ne, cikondo cyàjikì, dìbà dya Citampì cya ndekeelu. Nenku indilaayi too ne patwàbwelà mu Bitampì abi kadi nùmonè mwaba wùdi Citampì aci.

Paanyima pàà nwènù bamane kupeta mbingu makumi mwandamutekète ayi, dìbà adi mònaayi mwaba wùdi Bitampì abi: “Cikondo cyàjikì,” bupikudi bwàjikì, Yèyè ùdi mpindyewu Ntambwe ne Mulumbulwishi. Yèyè m’Musùngidi webè mu dinda emu, kadi dîngà dituku Yèyè neikalè Mulumbulwishi webè.

64 Wa 8 too ne ku 1...mvensa wa 14 wa nshapita mwi5, ùdi ùbuulula cikondo cìdi Mwànà wa mukooko ne cya kukuukudiibwa, ne mu Dyulu ne pa buloba; Mukàndà mutwà bitampì mwandamutekète awu, Mwànà wa mukooko ùdi mukùmbànyine awu, Cìlongo Cipikudi aci. Ne kuumukila ku mvensa wa 8, too ne ku wa 14, Banjelo bàdi bàMukuukwila, bakùlù bàdi bàMukuukwila, Bifùkiibwà bìdi ne mwoyi bìdi bìMukuukwila. Ne Yone wàkaMukuukwila bikolè mu mushindu wà ne yèyè wàkamba ne: “Cifùkiibwà cyònsò mu Dyulu, pa buloba, mwinshi mwa buloba, bàakangumvwa ngamba ne: ‘Mabènesha, butùmbi, bukolè, lungenyi, ne ngulu bìikalè kùdi Mwànà wa mukooko.’” Cikondo cya dikuukwila dya Mfumu-



Mwânà wa mukooko. Mpindyewu, Ekeleeziya mmumane kuya, nwavülukaayi.

<sup>65</sup> Mpindyewu tùbuululààyaaku mu Danyèlè, mu nshapita wa 9, kuumukila ku mvensa wa kumpala too ne ku mwi<sup>3</sup>. Ne pashiishe netwàngatè wa 20 too ne ku wa 27, bwalu eci cidi anu disambila dya Danyèlè cyqnààna. Ndi muswe bwa nùbalè nùbalululè cyôci eci, lumingu lujimà elu, mpindyewu, too ne panwàcyümvwà.

*Mu cidimu cya kumpala cya Dayàwèshà mwânà wa...dimiinu dya beena Meedàayi, wàkavwijiibwa mfumu kumutù kwa cipaapu cya beena Kasàdà awu;*

*Mu cidimu cya kumpala cya bukòokeshi abu mèmè Danyèlè...-mvwa, kuumvwa ku mikàndà ne búngi bwa...bidimu, bivwà díyi dya Nzambi dílwè kùdì Yelèmiyà mupròfeta ne, yèyè úvwa mwa kukùmbaja bidimu makumi mwandamutekete mu kabütù kàà Yelusàlèma.*

Mpindyewu (udì ulondà awu) *Mèmè kutàngija mpala wanyì kùdì Mukalenge Nzambi, bwa kukeba mu disambila ne misèngeleelu, ne kujila kwa byàkudya, ne mufuku, ne butù.*

*...mèmè kusambila MUKALENGÈ...Nzambi, ne kwenza ditonda dyànyì,...*

<sup>66</sup> Ki kutùngunukayè, too ne mpindyewu patùdì tukafika ku mvensa wa 20. Bwa kulaminyina díbà, bu mùdì bantu biimàne kuulu, ndi muswe nùkafikè ku mvensa wa 20, too ne mutwàpwekà mpindyewu ku—ku mvensa wa 20.

*Nenku pàncívwa anu ngaakula, ne nsambila, ne ntonda mpekaatu wanyì ne mpekaatu wa cisàmbà cyànyì cya Izaleela, ne mfilà misèngeleelu yànyì kumpala kwa MUKALENGÈ Nzambi wanyì apu bwa mukùnà wà cijila wà Nzambi wanyì,*

*Cibi, pàncívwa anu ngaakula mu disambila apu, muntu Ngabüdyèlè awu mene, úmvwà mumòne mu cikèèna-kumòna ku ntwàdijilu awu, kubangayè... kupaapalayè lubilu, kundengayè lwà pa díbà dya mulàmbù wà dilòlò.*

*Ki kumpèèshayè dimanyisha, ne kwakulayè naanyì, wàmba ne: Eyì Danyèlè, ndi mulwe mpindyewu bwa kukupèèsha mitàlu ne luumvu.*

<sup>67</sup> Twìkalakù nanshà piine apu's wè! Mmunyì mwàkamupetàYe? Mu disambila.

Mwanjelo awu, “muntu awu.” Mònaayi ne, yèyè wàkaMubiikila ne, “muntu awu.” Nenku mwikàle wa...

*Nenku ku ntwàdijilu wa misèngeleelu yànyì díyi ditùma ndilwe, (ne kulwadì bwa yèyè kuya), ne*

*ndi mulwe bwa kukuleeja wêwè; bwalu wêwè udi munangùbwe bikole; bu . . . ki bwa cinyi umvwà mùdi bwalu, wàngatè cìkèèna-kumòna aci ne mushinga.*

*Mbingu makumi mwandamutekètè mmikòsela cisàmbà cyebe ne cimenga cyebe cya cijila, anyi cimenga cyebe, bwa kulekeesha dishipa dya mikenji, . . . kujikija mpekaatu, ne kwenza dipungisha bwa bubì, ne kubweja bwakànè bwa kashidi, ne kutwa citampi ku cìkèèna-kumòna ne cipròfetà, ne kwela Mutàmbe cijila maanyi.*

Ki tubingilà tusambombo twa dilwa Dyèndè ntwòtò atu. Mpindyewu tângilàayi.

*Mpindyewu, ki bwa cinyi, ki bwa cinyi manyà ne umvwà ne, (mpindyewu tèèlejàayi) kuumukila ku dipátuka dya diyi ditùma bwa kwalujulula ne kwibakulula Yélusalèmà too ne ku . . . Maasiyà Mfumu awu nekwikalè mbingu mwandamutekète . . . mbingu makumi asambombo ne yibidi; ne mùsèèsù newibakuludiibwè, ne bimanu, nansha mu cikondo cya lutátu.*

*. . . paanyima pàà mbingu makumi asambombo ne yibidi Maasiyà neùmushiibwè, kadi kaciyi bwèndè yèyè mwine to; ne bantu bàà mfumu wálwa—mfumu wálwa . . . kubùtula cimenga ne mwaba wa cijila, ne ndekeelu wàci neikalè ne nkwaka, . . . too ne kundekeelu kwa mvita kabùtù nkalongolola.*

*Ne yèyè neàshindikè cipungidi (tèèlejàayi) ne bààbùngi bwa lumingu lumwe, lumwe lwà ku mbingu makumi mwandamutekète eyi, kadi munkaci mwa lumingu alu yèyè neàlekeeshè mulàmbù wà mashi ne . . . mulàmbù wà bukula, ne bwa ditàmba kutangalaka dya cinyangu yèyè neàcìvwijè kabùtù, mene too ne ku dikùmbana dya maalu ónsò, ne cidi cìlongolola aci cipòngolodiibwa pa cidi cibùtula.*

<sup>68</sup> Mpindyewu, ki dileesòna dyetu ndyòdi adi bwa masangisha asatu, anaayi, anyi ataanu àdi àlondà, cyònsò cyàbuululà Mukalenge aci. “Mbingu makumi mwandamutekète.”

<sup>69</sup> Mpindyewu, nèndombèku Doc, yèyè muswe, dilòlòlò edi, bwa kuntèèkelakù mboodi wanyi awu kuntu kwàka, bwa ngaamònakù mwa kucifunda. Ncyèna muswe bwa kunùpitaci to. Mpindyewu bìkèngela nùlongè pamwe naanyi, ne nùlongè mu ndòndò, bwa cyanààna necinùpitè. Ne ndi muswe kucizòla ku mboodi eku, nenku dîbà adi nùlwe ne crayons yenu ne mabeji bwa nùfundè matuku a ngondo aa, bikondo ebi, ne byònsò abi.

<sup>70</sup> Mpindyewu, mbingu makumi mwandamutekètè yidi yibanga (mpindyewu umvwàyi eci) paanyima pàà Ekeleeziya mumane kuumushiibwa. Mpindyewu, bònsò bàdi búmvwe aci, ambàayi

ne: “Amen.” [Disangisha didi dyàmba ne: “Amen.”—Muf.] Mpindyewu, paanyima pàà Ekeleeziya mumane kuumushiibwa.

<sup>71</sup> Bwàkabuulwibwà 6.1, too ne ku Bwàkabuulwibwà 19.21, bìdi bipetangana ne mbingu makumi mwandamutekète, ki bwa cinyi tudi ne cya kwimana bwa kuumvwija, kumpala kwa twètù kutàmba kuya kule. Tudi ne cya kwimana bwa kuumvwija bwa cinyi mbingu makumi mwandamutekète eyi. Bwalu, kanùyì benze nanku to, Bitampì abi nebinùpìtè, Mpungi ayi neyinùpìtè, Mpànzà ayi neyinùpìtè, Bipùpù abi, nyuma ya bukooyà yisatu mifwanàngàne ne ndimbà ayi, Makènga asatu awu, diipata dya dragon mukünze awu, mukàjì udi mu dîbà awu. Byònsò abi nebinùpìtè, nwênù kanùyì benze nanku, bwalu bìdi byènzekela mu lumingu lwà mwandamutekète elu mene. Ki mùdibi byènzekela.

<sup>72</sup> Mpindyewu, mupròfetà Danyèlè ùvwa mu Baabùlònà kùkaavwa bidimu makumi asambombo ne mwandamukùlu. Nwênù bàdi baswe kutàngila tuntu twa dileedila, ne kudìlaminyinakù dîbà, dîndì mèmè mupìcishile ku—ku dikeba. Bidimu makumi asambombo ne mwandamukùlu! Wàkaya mu bupika mu cidimu cya 606 kumpala kwa Kilisto, ne pàakalwà cikèèna-kumòna aci kùdiye mùvwa—mùvwa mmu cidimu cya 538 kumpala kwa Kilisto. 606 kuumusha 538 kùdi kùshààla makumi asambombo ne mwandamukùlu. Bidimu makumi asambombo ne mwandamukulu bikaavwàye mu Baabùlònà, munkaci mwa bampàngaanù, kadi mwikàle anu ne bucimunyi. Amen. Twètù katwèna mwa kushààla dîbà dyetu dimwepele edi to.

<sup>73</sup> Kadi yêyè ùvwa anu munkaci mwabo menemene, kàyi ne muntu to pa kuumusha banyààndè basatu, ne biine abu mu bitùpà bishìilàngane bya bukalenge abu. Kadi, Danyèlè, mwimane nkàayendè ne Nzambi, wàkashààla mulame bucimunyi munda mwa bidimu makumi asambombo ne mwandamukùlu. Anjì elàayikù pèènù meeji! Ncyèna muswe kubanga kuyiisha to, bwalu eci cidi ne cya kwikala Diiyisha dya dilongesha. Kadi, bidimu makumi asambombo ne mwandamukùlu, yêyè wàkashààla mulame bucimunyi ne kàyi mukooyike to, kumpala kwa Nzambi; kàyi ne dibàtiiza dya Nyuma Mwîmpè, kàyi ne Mashi a Yesu Kilisto bwa kwikala kumwakwila to; mwikàle anu ne mashi a bimpàngà bya ngombe, ne mbuji, ne nkùngùlù ya ngombe, miine ayi yìvwà yikèngela bwa kwikalayè ùlàmbula mu musokoko, bwa bilèlè bya bampàngaanù bya ditùnga adi. Bàvwa bayè naabo muntwamu. Yèlèmiyà ngwàkamba cipròfetà bwàbò bôbò ne, nebàyemù.

<sup>74</sup> Mpindyewu, Danyèlè, kaa, ekelekele, ùkaavwa mubangè kumòna ne cikondo cikaavwa cyènda ciseemena, anu mutùkaadi pèètù leelu ewu emu. Danyèlè wàkabanga “kuumvwa,” mwàkambàye, “ku dibala dya mikàndà.”

Nenku mu cidimu cya kumpala cya bukòòkeshi abu bwa...*Danyèle*...mu bukòòkeshi abu mèmè *Danyèlè ngákumvwa ku mikàndà búngi bwa*... *bidimu*, ki bwa cinyi...*díyì dya MUKALENGE dyàkalwa kùdì Yelèmiyà mupròfetà, bwa ne kùvwa ne cya kukumbana bidimu makumi mwandamutekète mu*...kabùtù kàà *Yelusùlèmà*.

<sup>75</sup> Yelèmiyà, mu cidimu cya 606 kumpala kwa Kilisto, wákamba cipròfetà ne, bwa mpekaatu yabo ne dipeetù dyabo dya maalu a Nzambi, bàvwa mwa kwikalakù bidimu makumi mwandamutekète.

<sup>76</sup> Nudi bavùlùke ne, kwàkajuuka mupròfetà mukwabo mu diine dituku adi. Ncyèna mwa kuvùluka dínà dyèndè pa díbà edi to. Ndi mufwànyine kupeta mushindu wà kunùpeteladi mu—tusunsa tukese, bu mèmè mwa kukeba mu katanci emu. Kadi yèyè awu wàkajuuka e kwamba ne: “Yelèmiyà, udi mutùpàkàne. Nzambi neàlamè Izaleela muntwamu anu bwà matuku búngi kampanda, búngi kampànda, bu bidimu bibidi nanku awu.”

<sup>77</sup> Yelèmiyà kwambayè ne: “Biikalè nanku. Amen.” Yèyè ne: “Kadi anji indilà kakese. Mèmè ne wèwè twànjibi kukenketangana túng, twètù bu bapròfetà.” Kwambayè ne: “Wavùluka ne, kùkaadikù aba bàtu bambè bipròfetà kumpala kwetu, ne bàákamba bintu byà mafi. Ne Nzambi wàkatàngila bwalu bwàbò bwa dyamba dyàbò dya bintu bya mafi adi. Pa nanku, twikalè batwishiiabwe. Kadi Mukalenge Nzambi mmungambile mèmè ne kùdì bidimu makumi mwandamutekète.”

Nzambi kutàpaYè mupròfetà wa mashimi awu, ne kwangataYè mwoyi wèndè mu cidimu cimwecimwe aci, bwalu Nzambi úvwa mwambile mupròfetà mulelèlè ewu ne kùvwa bidimu makumi mwandamutekète.

<sup>78</sup> Nenku ndi muswe bwa nwènù kumòna mùvwà Danyèlè, pèndè mwenyi, pèndè mwipata mu cisàmbà cyabo, mwipata mu ekeleeziya wèndè, kàyikù ne masangisha a ekeleeziya to, kàyikù ne ekeleeziya wa diya to, kàyikù ne misambu ya kwimba pa kuumusha anu yìvwàye ùdìmbila yèyè nkààyèndè ayi, munkaci mwa biine byònsò ebi, kacya anu wàkwàta ku civwà mupròfetà awu mwambe aci. Amen! Amen!

<sup>79</sup> Kàyikù ne ekeleeziya wa diya to, muntu nansha umwe wa kwenzakù nendè bwobumwe; bantu bònsò bàvwa bàya mu ntempelu ya bampàngaanù, bantu bònsò bàvwa bàkuukwila mpingù yabo. Kakùyì misambu ya beena Kilisto; muntu nansha umwe kàyì wìtabuuja cintu cimwecimwe nendè to. Kadi munda mwa bidimu makumi asambombo ne mwandamukùlu, kubangila anu pàcìvwàye mwànà wa bidimu dikumi ne bibidi, dikumi ne binaayi, pààkayàbo nendè muntwamu apu, úvwa anu

ne lulamatu kùdi Nzambi; nenku kuumvwilayè ku mupròfetà Yelèmiyà ne matuku àkaavwa pabwipi ne kukumbana.

Mushindu mwine wùdi aci cifwànyine kudimwija mwoyi wà mupròfetà mulelèlà kanà yònsò wa Nzambi leelu ewu's wè, bwa twètù kutàngila paanyima ne kumòna cidi mupròfetà mulelèlà ewu mwambe, ne kumanya ne tudi ku cikondo cya nshikidilu.

<sup>80</sup> Kwambayè ne: “Mémè kuumvwila ku mikàndà yìvwa Yelèmiyà, mwaneetu, mwambe cipròfetà kùkaadi bidimu byàbùngì menemene ne, Izaleela neàshaalè muneemu emu bidimu makumi mwandamutekète. Ne cikondo aci cikaadi cyàmba kukumbana.” Ki kudilongololayè. Ki kweleshayè díyi bwa kujilabò byàkudyà, ne kudijidilayè yèyè mwine, ne pàvwa...ne butù ne mufuku, ne kudiyèlayèbu mu mutù, ne kuditwayè mu kujila kwa byàkudyà ne kusambila, bwa kuumvwayè ne ndituku kaayi divwàbo ne mwoyi adi.

<sup>81</sup> Kadi piikalàbi ne Danyèlè, mupròfetà wa Nzambi, wàkatàngila mu mikàndà ya Yelèmiyà, ne kumufikishaci mu kaaba kàà nanku awu; ne nansha Izaleela bwa kupàtuka, bònsò ne mwoyi, bàpàtuka mu Baabùlònà, bwa kwalukilabò ku buloba bwàbò, piikalàbi mwa kumusàka ku dijila dya byàkudyà muvwàle mufuku ne mudyèlè butù. Ambàayaaku tũng mwàbèngàci kwenzeja Ekeleeziya wa Nzambi udi ne mwoyi, bwa kumanya ne díbà díkaadi díbwicidila ne kadyàkwikalaku kabidi; ne Dilwa dya Mukalenge Yesu Kilisto, ne Bukalenge bunene bwa bidimu cinunu bùkaadi pa kudishikika! Mmunyi mutùdiku mwa kupicisha díbà, mu kwenza kwa manayi a mfranga, kuya kwowela mu ciinà cya màyi mu maadyàlumingu, katuyikù ne díbà bwa Mukalenge? Anu kunyeemena ku... Mpaasàtà yèyè mwakùle pa cintu kampànda cyúdi kùyi muswe to, udi ujuuka upàtuka. Ne ekeleeziya yèyè—yèyè anu munènge ntàntà mupitèpìte bule, mòna's, udi—udi, udi—udi udyumvwa kùyi musànkishiibwe to. Tàngilàayi ngiikàdilù wetù. Tàngilàayi bitùdi twètù twenza.

Anji fwànyikijàayibi yetu nsòmbelu ne wa mupròfetà awu. Muntu umwepele, mu bukalenge bujimà abu, kàyi ne ekeleeziya wa kuya, ne mwaba mukwabo nansha wumwe wa kuya. Cimenga cyèndè cívwa cyupula, cyosha cibùtula; cisàmbà cyèndè cívwa mu bupika. Bidimu makumi asambombo ne mwandamukùlu! Makumi asambombo ne mwandamukùlu, makumi asambombo ne citeema, makumi mwandamutekète; kùvwa kumushààdìle bidimu bibidi. Nenku pààkabangàye kubala mu mukàndà ne kumònayè ne cikondo cikaavwa cyènda ciseemena ku dyula, bwa kuulaci, ki kuyayè kùdi Nzambi mu disambila, bwa kujandula ne cívwa cinyi.

<sup>82</sup> Cikondo kaayipu's wè! Citùdi twètù twenza ncinyi? Pàdibi ne: “Matùnga àdi àpanduluka; mbù ùkungula; myoyi ya bantu yàmba kwimana bwa bwòwà; dipampakana dya cikondo.” Bintu byònsò ebi, mufundù ku cimanu. Disungulujangana

dya bisà; maalu mabi a mishindu yònsò ènzeka pa buloba; makòkyanganyi, ne mvita ne dibìnduluka. Ne bingoma bilembeleja mu matanda, mu mushindu wà kaaditunga kakese kamwe kàà bunene bwa Cuba aka kiikàle mwa kubùtula buloba mu tusunsa dikumi. Ne bôbò munkaci mwa kukòkangana aba ne aba, bantu bapeetudi bàà Nzambi bàdi kabàyi bamanyè Nzambi ne kabàyi bamanyè bukole Bwèndè to.

Kadi Nyuma Mwîmpè mu Ekeleeziya, ùkwàta mudimu munkaci mwa Basungula, ùDileeja ne mwoyi paanyima pàà bidimu binunu bibidi ne, Yèyè ùdi umwèumwè awu makeelela, leelu, too ne kashidi. Mmunyi mutùdiku mwa kushààla ne lulèngù? Mmunyi mutùdiku mwa kwangata anu bwalu abu ne mapeepelela? Dìbà dikaadi dyakàne dya twètù kwikala tudikenketa, bindile dìbà dya butùmbi didi dyènda diseemena adi.

<sup>83</sup> Mpindyewu, yèyè wàkabala mu Yelèmiyà, nshapita wa 25. Tùbuululàayi mu Yelèmiyà, nshapita wa 25, ne tùbalàayi civwà cikèngela bwa Yelèmiyà kwambayè. Mu bushuwa bwa bwalu, tùbangilàayi ku mvensa wa 8, bwalu ùdi . . . Ndi muswe nwikalè batwishùbwe ne nwàcyùmvù. Ku mvensa wa 11 nkùmvwà mufunde kaaba aka bwa kubala, kadi tùbangilàayi ku mvensa wa 8 aku.

*Ki bwa cinyi emu mmùdi MUKALENGE wa bilwilu wàmba; . . .*

Mèmè ndi anu munange aci. Pàndi mwa kuumvwa mupròfeta ùjuuka ne EMU MMÙDÌ MUKALENGE WÀMBA, mwaneetu, s'ki cyòci aci. Bwànyi mèmè, aci's ncikòse bwalu. Ki cyònsò cidiku ncyòci aci.

*. . . emu mmùdi MUKALENGE wa bilwilu wàmba: Bwalu kawèna batèèlèje mèyi àanyi,*

*Mònaayi, mèmè nèntumè bwa kwangatabò fàmiyè yònsò ya ku nord, mùdi MUKALENGE wàmba, ne Nebukàndànèèsà mfumu wa Baabùlònà, musadidi wanyi, ne yèyè nealwe naabo cyakabidi . . . bwa kulwisha ditunga edi, ne kulwisha bàdi basòmbèlemù, ne kulwisha matunga ónsò àdi mu nyungulukilu mwónsò, ne mèmè nèmbàbutulè butùbutù, . . .*

Vulukàayi ne, bàdiYe wàmba abu bàvwa mbasungula bàà Nzambi. Kabàvwa beena dyabulu to. Bàvwa mbidimba bya ekeleeziya.

*Kabidi nèngùmushè kùdìbo dîyi dya disànka, . . . dîyi dya dicyònkomoka, (anu mutùdi twètù naabi muneemu emu, bidùndadùnda byònsò ebi, Ricky ne Elvis,) nenku, kaa, dîyi dya mubàki, . . . dîyi dya nyuunyi. . . anyi, dya mukàji-musèla's wè. mwadi wà dibwe dya mpelu, . . . bukènkè bwa kàndeeyi.*

*Ne ditùnga dijimà edi nedìshaalè dibütùke, . . .*

Tèelejààyi mùdi mupròfetà awu wèla lubilà ne: “Ditùnga dijimà edi nedìshaalè dibütùke!” Ne kí mbwa kutentula musadidi munene wa Nzambi ewu to, kadi mèmè ndi ngamba cipròfetà ne ditùnga dijimà edi nedìshaalè dibütùke. Nzambi neànyookè ditùnga edi bwa mpekaatu yàdi. Pìikalàbi ne Nzambi kàakalekela Izaleela, musungula Wèndè, Dimiinu dya Abraham, uvwa Yè mwenzè nendè cipungìdi ne mulayi, pìikalàbi ne Yèyè kàakaswà kubàlekela kabàyi bànyookiibwa bwa ngenzèlù wabo mubi awu; nansha mùvwàbo batèndeledi bàà mu ùmwè amu, biikàle ne ekeleeziya minene, ne baakwidi, ne baalaabi; kadi bwa byenzi bya nsòmbelu wa masandi ne bikwabo munkaci mwabo, Nzambi kubàfikishayè ku dinowa cìvwàbo bakùne, ne twètù pèètù netùcipètè. Mvènsa wa 11:

*. . . ditùnga dijimà edi nedìshaalè dibütùke, ne . . .  
dikèmesha; . . .*

Mbwena kwamba ne, bantu bònsò bàtàngila bàmba ne: “Kí bòbò abu’s. Pààbò’s bàvwà banene bàà dikema. Bàtàngilaayaaku mpindyewu.”

*. . . nenku matùnga aa neàkwacilè mfumu wa  
Baabùlònà mudimu bidimu makumi mwandamutekète.*

Aci’s mmatuku abo ònsò a mwoyi’s. Apu’s mpàcìvwà mamwèbè mukùlàkàjì, mukùlàkàjì mubènèshìibwe awu mucìkàle mwànà wa mu dibòkò. Bàvwamù kabàyi ne Nzambi, kabàyi ne ekeleeziya, kabàyi ne musambu, kabàyi ne cinyi to, munda mwa lukòngò lujimà alu, too ne mwàkalwà lukòngò lwònsò lwà mpekaatu alu kubütukalù.

*Ne nebyènzekè ne, pìikalà bidimu makumi  
mwandamutekète abi byùle, mèmè nènyookè mfumu wa  
Baabùlònà, ne ditùnga adi, mùdi MUKALENGE wàmba,  
bwa bubì bwàbò, ne ditùngà dya beena Kasàdà, ne  
nèndìvwijè kabütù kàà kashidi.*

*Nenku nèmvwijè pa ditùnga adi mèyi àànyi mabi ònsò  
ànkaadi mwambàmbe bwa bwalu bwàdì, àdì mafùnda  
mu mukanda ewu awu, àdì Yelèmìyà mwambe mu  
cipròfetà bwa kulwisha naawu ditùngà dyònsò.*

*Bwalu matùngà àbàngì ne bamfumu banene  
nebàbàkwatè pààbo bu beena mudimu—bu beena  
mudimu, ne nèmjàfutè. . . bilondèshìle byenzi byàbò,  
ne bilondèshìle mèyi àbò a ku byanza byàbò sungasunga.*

*Bwalu emu mmùdi MUKALENGE Nzambi wa Izaleela  
ùngambila: Angàtà lupànzà lwà mvinyò wa ciiji  
lwà mu cianza cyànyi, ne ùdìmwishè matùnga ònsò,  
kùngààkutùmà aku, bwa kudinwabo.*

Mu ngaakwilù mukwabo ne: “Yelèmìyà, Mèmè ngàakupèeshi mukenji ewu. Kùshààdi mupùwe to. Kùshààdi kaaba kàmwe

to, kadi ambilà matùngà ònsò cipròfetà.” Nudi nucìlonda anyi? “Ambilà ditùngà dijimà cipròfetà. Leejà bimanyinu Byànyì ne maalu a kukema, ne bàmanyìshè ne Mémè ngudi ulwa bwa kwenza cyòci eci.”

*Nenku bóbò nebànwe, ne nebàtetukè, ne nebàpaalè,  
bwa díyì dīngààtùmà munkaci mwabo.*

<sup>84</sup> Cidìbò bènza ncinyì mu dituku edi mene? Bàdi bàkubiikila wèwè mùdi mupròfetà wa—wa mashimi, bàkubiikila mùdi mudì wa—wa cibàngà, bàkubiikila mùdi mukoleshi wa—wa maalu, mwena mikendi, anyi mulòoci wa bilòotà, anyi mubadi wa mu meeji a bantu wa mushindu kampànda. “Bóbò’s nebàpaalè mukupa!” Ne mwaku ewu *mupàlè*, wèwè muswe kuwùsùnsula, wùdi wùmvwija ne “mwena mukupa.” “Bóbò’s nebàpaalè mukupa anu wètù wa cya bushuwa ewu, bàmba ne: ‘Aa, kanùtèyikù ntèmà kùdi munsantu mubùnguluki wa mu malaba awu to, lukutukutu alu,’ bwa Díyì dīNgààtùmà munkaci mwabo.”

<sup>85</sup> Nudi numòna mùdi maalu-malonda ènzuluka amu anyi? Yelèmiyà kàvwakù mufwànyine kupetangana ku mèyì ne Bàfaalèsa, Baasadokà, beena Helòòdà bààbò abu, nansha bafwànyine kwikala cinyì to. Yèyè, ùvwa yèyè anu wèla Díyì patòòke, ne Dìvwa dyènza ne bònsò bàmumvwilè cijì. Cinyì? Mpindyewu mònaayi.

*Nenku pashùshe mémè kwangata lupànza alu ku  
cyanza cya MUKALENGE, ne kunwisha matùngà ònsò cyòci  
aci, . . .*

Yelèmiyà kààkashàalakù musòmbe kumbelu to. Yelèmiyà kààkashàala mu kaaba kakese kàmwè to, kadi wàkacinwisha matùnga ònsò.

*. . . kùvwà MUKALENGE muntùme aku;*

<sup>86</sup> Yelèmiyà wàkangata Díyì dya Mukalenge, mvinyò wa Díyì Dyèndè. Ne mvinyò mbukole bwa Díyì Dyèndè. Mvinyò ùtu ne bukole kampànda. Mvinyò ndikwàcika. Mvinyò ùdi ne bukole kampànda paanyima pèndè. “Nenku mémè kwangata Díyì dya Mukalenge,” mwàkambà Yelèmiyà, “ne mémè kuDimwènesha. Mvinyò, bukole bùdi mu Dyòdi abu, mémè kubùleeja patòòke kumpala kwàbò, kadi bóbò kabàyi mwa kuDitèelejakù to.”

Nzambi kwambaYè ne: “Nanku Mémè nèmbàtùmè bwa bidimu makumi mwandamutekète mu Baabùlòna.” Ki cyàkenzàYe menemene. Ne baakàne ne bàvwà kabàyi baakàne bààkaya, bya mwomumwe.

<sup>87</sup> Mpindyewu, twàlukilàayi ku dileesòna. Danyèlè ùvwa ùbala. Anjì elàayi anu meeji, Danyèlè wàkabala Mèyì anu òwò àmwèàmwè atùdi twètù tubala mu dinda emu aa. Danyèlè ùvwa ùbale Bible anu umwèumwè ewu, bimanyinu bya mu difùnda anu bimwebimwe ebi, byambilu anu bimwebimwe ebi, bintu anu



bimwebimwe bìndi mêmè, ku dyambulwisha dya Nzambi, ne cya kunùbadila mu Mayiisha àdi àlonà aa, cintu anu cimwecimwe aci, bwa kunùleeja ne tudi ku cikondo cya nshiikidilu.

Nenku Danyèlè, wàngata Dîyi dya kùdi Yelèmiyà, kuyayè mu Baabùlònà. Ne yêyè ùvwa mupròfetà mulààba. Ne yêyè wàkenza bishima, bimanyinu, ùvwa mwa kwandamuna myakulu myenyi, ne kwenza bimanyinu ne maalu a kukèma munkaci mwàbò. Cibi, mwimane nkààyendè, pàà nkààyendè! Amen! Ùvwa mwimane pàà nkààyendè.

<sup>88</sup> Kadi Yelèmiya ùkaavwa mufunde Mèyi aa bidimu byàbùngì menemene kumpala. Nenku Danyèlè, ùmvwiya Dîyi, kupetayè. . . “Mòna, mpindyewu anji indilà kakese. Tukààdi tufika pabwipi ne ku cikondo cya nshiikidilu, bwalu nkàadi mumane kwenza muneemu bidimu makumi asambombo ne mwandamukulù. Ne mupròfetà wa Mukalenge,” amen, “mwaneetu, mupròfetà mulelèlè wa Nzambi uvwa mujaadike ne yêyè mwine mmupròfetà awu, wàkatwenzela cipròfetà. Ndi naaci cifunda mu mukàndà mwab’ewu, cyambè ne: ‘Bidimu makumi mwandamutekète nebyùlè.’ Éyi Mukalenge Nzambi, nyewu tukàadi tusemena ku ndekeelu. Lukòngò lujimà alu ndwelu lwàbùtukù. CìWenzà ncinyi mpindyewu, Mukalenge? Wèwè wàkalaya bwa kutùtùmina. . .” Kì kudìlongololayè, bwa kusambila.

<sup>89</sup> Éyi Nzambi, ní kùvwakù cikondo cìvwa cikèngelà bwa twètù aba kudìlongolola, bwa kusambila, s’mpindyewu. Bwalu, twètù bu musadidi Wendè mulelèlè, tudi tumòna, ku Mikàndà mitùfundila kùdi mupostolo, ku madìmwija a kùdi Nyuma Mwìmpè ne, tudi mu dituku dya ndekeelu. Nyuma Mwìmpè ngudi wamba ne: “Mu matuku a ndekeelu, bantu nebìikalè bapapè mitu, badibàndishi, banangi bàà bisànkasanka kutàmba kwikala banangi bàà Nzambi, kabàyi bàkùmbaja mèyi àdìbo bàmba, bashiminyinyanganyi bàà maalu, kabàyi ne kudìkànda, ne bapeetudi bàà aba bàdi bìmpè.” Mémè ndi ngumvwila ku Mukanda mutùfundila.

<sup>90</sup> Ne ndi ngumvwa nekwikalè baseki, mu dituku dya ndekeelu. Ndi ngumvwa ne nekwikalè ditùnga dilwishangana ne ditùnga dikwabo, mu dituku dya ndekeelu. Ndi ngumvwa ne nekwikalè mavwala a màyi a mbù, mu dituku dya ndekeelu. Ndi ngumvwa ne nekwikalè bintu bya bìkwàcisha bwòwà pa kubimòna, bu mùdi tuumàlòngò tudi tùbùuka muulu, mu dyulu, bimwèka kabìyi byùmvwika to, ne myoyi ya bantu neyìikalè yàmba kwimana bwa bwòwà. Nekwikalè dipampakana dya cikondo, ne dikènga munkaci mwa bantu. Ndi mubale ne bònsò nebàbwelè mu malongolodi ne màngumba, ne nebìikalè ne nsangilu kampànda, mu dituku dya ndekeelu. Ndi ngumvwa ne bakàji nebìikalè bàbebula nsuki yabo mu dituku dya ndekeelu. Ndi ngumvwa ne nebìikalè bàvwàla tulàmbà twìpi, ne bènda ne bisàbaatà bya tulundu, byènda bidila panshi pàdìbo bènda bàya

apu, mu dikuku dya ndekeelu. Ndi ngumvwa ne nekwikalè diteketa dya mu mabòkò dyabúngi be mu ditùkù dya ndekeelu. Ndi ngumvwa ne bayiishi nebiikalè balami bàà mikooko bàà mafi mu dituku dya ndekeelu, nebiikalè bàdya cibàngà, ne kabàakudiisha bantu Dìyì dya Nzambi to, kadi pamutù pàà aci, nebàlondè twitabàayi ne bikwabo. Kadi ndi ngumvwa ne nekùlwe Dìyì mu matuku a ndekeelu, dyèla lubilà mu cipèlèl, dìbiikila bantu bwa kwalukilabò ku Mukenji wà ku cibangidilu, bwa kwalukilabò ku maalu a Nzambi. Ndi ngumvwa, ku Mukàndà ne, maalu awu neènzekè.

<sup>91</sup> Ndi ngumvwa ne mu matuku a ndekeelu nekùlwe ciyòòlè cya nzala. Ekeleeziya neyiikalè midivwiè malongolodi, ne midijaalàmije bikolè ne bikwabo byònsò, mu mushindu wà ne mu matuku a ndekeelu nekùlwe ciyòòlè cya nzala, ne kacýàkwikala anu cya byàkudyà ne màyi nkààyaabi to, kadi cya kuumvwa Dìyì dilelèlè dya Nzambi. Ne bantu nebàfuminè ku esètè, ku wesètè, ku nord, ne ku sud, bènda bàkèba bwa kuumvwa Dìyì dilelèlè dya Nzambi. Kadi ekeleeziya neyiikalè mitàmbe kudivwiija malongolodi ne kudiswika ndendende, mu mushindu wà ne nebàpangè kuDyùm vwa. Mémè ndi ngumvwila aci ku Mikàndà. Kadi, mu dituku adi, Éyì Nzambi, nekùjuukè Ditàmbà ku Davidi.

<sup>92</sup> Ndi ngumvwa ne Yèyè neàtumè Eliyà kumpala kwa dituku adi kufikadi ku cikondo cya nshìikidilu, ne yèyè neikalè ne Mukenji wikalà mwa kwaluja myoyi ya bàna kùdi baataatù, wùbààluja ku cya ku cibangidilu, bààlukila cyàkàbidì ku ndekeelu, ne bàbangulula. Ndi ngumvwa ne aci necyènzekè anu pabwìpi ne Nyuma kuumuka mu ekeleeziya wa bàà Bisàmbà bya bendè, bwa kwalukila kùdi beena Yudà.

<sup>93</sup> Kadi ncyèna ngumvwila anu ku Mukàndà mutùfùndila nkààyaawù to. Ndi ngumwila ku Dìyì, ku Dìyì difùnda ne, Izaleela neàpinganè ku buloba bwèndè; ne ndi mmumòna ùbwelamù.

<sup>94</sup> Ndi ngumwila ku Mikàndà mitùfùndila, ya bapròfetà ayi ne, Izaleela neàshaalè ditùnga. Bòbò nebàlongololè cyàkàbidì dikuukwila dya mu ntempelu. Nzambi neàbangè kukwata nendè mudimu cyàkàbidì pààfikàye mu buloba bwèndè. Kaa! Bapròfetà babidi nebàjuukè mu matuku a ndekeelu, pàmwe naabo. Ndi ngumvwa nanku. Pàdi anu Ekeleeziya wa bàà Bisàmbà bya bendè ùpàtuka, bapròfetà babidi nebàfikè, Elishà ne Mòsà, mu Izaleela. Netùcyùm vwe patwàkenketà byònsò.

<sup>95</sup> Mupròfetà wàkamòna ne cikondo cikaavwa pabwìpi ne kuula mu Baabùlònà amu. Eyo.

<sup>96</sup> Ngabùdyèlè ùdi ùmwènèka, kacìyi anu bwa kubuulula bìvwàye ùkonka abi to, kadi bwa kumwambilayè mu kaabujimà byònsò bikaavwà bipàngadika bwa cisà cya beena Yudà, too ne ku dikumbana dya maalu ònsò. Amen! Wàkakonka ndambu

mukese, kadi kupetayè cintu cyònsò nkòòng. Wàkakonka anu bwa kumanya cyanààna . . .

<sup>97</sup> Danyèlè ùvwa ùteeta bwa kujandula ne: “N’too ne ku dîbà kaayi, Mukalenge, kwikalàci mpindyewu? Yelèmiya mupròfetà, musadidi Webè, mwaneetu awu, mmwambe cipròfetà kùkaadi bidimu makumi asambombo ne mwandamukùlù, mwambe ne: ‘kùdi bidimu makumi mwandamutekètè byàshààla bantu aba muneemu.’ Lukòngò lwà kale pàmwè ne lwònsò lùkaadi lujikè patùdi twakulangana apa.”

<sup>98</sup> Kùdi lukòngò lwà kale lwa beena mpenta lùdi lujukè, kùkaadi bidimu makumi anaayi. “Balwanganyi bàà mvita bàà kale,” mwàkabàbìkilàbo. Kudìvwijabò bulongolodi, ne kutuutanganabò, ne kukòkanganabò, kuumukila anu ku Mukùnà wà Holèbà ne Nebò, too ne kwònsò aku. Kadi, ndekeelu wa byònsò, tudì ku musùlù mpindyewu. Yèyè neàjuulè lupyalùpyà, ne Yoshùwà kampànda bwa kubàsabwisha. Mikenji kupangilayi; Mòsà kuyayè naayi; Mòsà kupangilayè. Yoshùwà kubàsabwishayè. Tudì tusangana ne malongolodi mmapangile, kadi Nyuma wa Nzambi. . . Yoshùwà, mwaku ewu *Yoshùwà*, wùdi wùmvwija ne “Yesu Musùngidi wetù.” Nenku, Nyuma Mwìmpè neàbwelè mu Ekeleeziya. Kì mbulongolodi nansha, kadi Nyuma Mwìmpè neàlwe munkaci mwa bantu ne neàMulongòlòlè bwa kubànda, kusabuka Yadènè. Ndi ngumvwila ku dibala dya Mukànda ne ki cidì ne cya kwenzeka. Ne Nzambi mmumanye ne ki cyòci aci cìndì munkaci mwa kukeba mpindyewu, bwa ngaamòna mwa kukànkamika cisàmbà Cyèndè ne kubàmbila ne cikaadi pabwìpi ncinyi, ne apa mu dinda emu, ne mu matùnga mwònsò mwàyà mikàbà ya mèyi eyi, mu buloba bujimà, bwa ne tudì ku cikondo cya nshìkidilu.

<sup>99</sup> Yèyè mmubuulùle byònsò too ne mwàkaalujuludiibwà Bukalenge anu menemene ne mwàkajaadikiibwà Bukalenge bwa bidimu cinunu. Ki cìvwà mukenji wà Ngabùdyèlè. KwambaYè ne: “Ndi mulwe bwa kukwambila ne, kùcidi bidimu makumi mwandamutekètè, mbingu makumi mwandamutekètè, bikòsela cisàmbà cyebe, bikòsa too ne kundekeelu kwa lukòngò lwà beena Yudà. Kùdi mbingu makumi mwandamutekètè.” Mpindyewu tàngilàayi cyàkambàYe. Bwa ne mpindyewu, kuumukila ku dipàtuka dya dyalujulula . . .

*Mbingu makumi mwandamutekètè mmikòsela  
cisàmbà cyebe ne cimenga . . . cimenga cyebe, . . .*

“Cimenga cyebe.” Baabùlònà kî nguvwa cimenga cyèndè to. Nganyi. . . Cimenga cyèndè cìvwa penyì? Yèlusàlèmà.

<sup>100</sup> Mpindyewu, patùdi tukafika ku dishindika dya—dya misangu mwandamutekete, anyi yisambombo, netùsanganè cìdi cimenga aci, ne kucisùnsula ne kujaadika ne yèyè ùvwa nganyi, nganyi wàkaciibaka, kùvwàci cifume mpenyi. Necìshaalè too ne

dîbà kaayi? Neciibakuludiibwè anyi? Mu cikondo kaayi? Kaa, bintu binène bidi mu cibùcilu bwetu twètù. Eyo.

*Mbingu makumi mwandamutekète mmikòsela cisàmbà cyebe ne... cimenga cyebe, bwa kulekeesha dishipa dya mikenji,...*

Mpindyewu, Yèyè kààkambakù ne: “Danyèlè...” Kakùyi mpatà to Yèyè wàkamwambila ne mbingu makumi mwandamutekète ayi yìvwa... Ndi muswe kwamba ne, bidimu makumi mwandamutekète abi bikaavwa pa kujika. Makumi asambombo ne mwandamukùlù, kupangike anu bidimu bibidi cyanaànà. Ne tudi tusangana ne cipròfetà cya Yelèmiya cyàkakumbana anu mu cyòci menemene. Bidimu bibidi pashiishe, bàakapàtuka. Nehèmiyà wàkaya ne kupetayè dîyi ditùma dya kùdi mfumu, ne kwibakayè lumbu mu cikondo cya lutàtu. Kwenzabò mudimu. KwambaYe ne: “Lumbu...” Tèelejàayi eci.

*...kulekeesha dishipa dya mikenji, ...kujikija mpekaatu,...*

“Bwa kujikija mpekaatu.” Bwa nganyi? Beena Yudà. “Mmikòsela cisàmbà cyebe,” kî mbàà Bisàmbà bya bendè to. “Cisàmbà cyebe,” beena Yudà. “Ne cimenga cyebe,” kî n’New York to, kî m’Boston, Philadelphie, Chicago, Los Angeles, Loomò to. Kadi: “Cimenga cyebe,” Yèlusàlèma.

*...ne bwa kulekeesha dishipa dya mikenji... kujikija mpekaatu, ...kwenza dipungisha bwa bubì, ne kubweja bwakànè bwa kashidi, ne kutwa citampì ku cikèènà-kumòna ne cipròfetà, ne kwela Mutàmbe cijila maanyi. (Tàngilàayi!)*

*Ki bwa cinyi manyà ne umvwà ne, kuumukila ku dipàtuka dya dîyi ditùma bwa kwalujulula ne kwibakulula Yèlusàlèma (uvwa cimenga cyèndè awu) too ne ku... Maasiyà Mfumu awu nekwikalè mbingu mwandamutekète, ... (ya makumi mwandamutekète ayi)*

<sup>101</sup> Indilaayi ne patwàbwelà mu cyòci aci! Kaa, ekelekele! Ndibènesha dya ne mémè... nèngiikalè mwa kwangata mwonji bwa kudiswikila ku kaaba aka.

<sup>102</sup> KucibuululaYè too ne ku ndekeelu, wàmba ne: “Ncyàkukwambila mpindyewu anu ne bidimu bibidi abi bikaadi pa kujika, nebijikè, nebyùlè to.” Kadi tudi bònsò bamanyè ne bàakashàalamù bidimu makumi mwandamutekète bulubulu, ne—ne kupàtukabò, anu menemene cìvwà mupròfetà mwambe. Nenku Yeshàayi, anyi ndi muswe kwamba... Danyèlè ùvwa mwitàbùuje mupròfetà awu, nenku ki yèyè ewu, mudilongòlòle. Eyo. Ki yèyè... .

103 Nenku mpindyewu, pàakalwà Ngabüdyèlè, Wákamba ne: “Ndi mulwe bwa kukuleeja byònsò, bwa kukubuulwila maalu awu, ne, byònsò too ne ku dikùmbana dya maalu ónsò.” Nwamonu anyi? Tàngilààyi.

. . . cinyangu *nkwàcifikishàye ku kabùtù, nansha mene*  
too ne ku *dikùmbana dya maalu ónsò, . . .*

104 *Dikùmbana dya maalu ónsò* mbwena kwamba ne “ndekeelu wa bintu byònsò.” “Nénkuleejè ciikalà mwa kwenzeka.” Mpindyewu tèelejàayi. Cyùmvwàyi! “Ndi. . . Danyèlè, Ndi mutùmìibwe. Wèwè udi munangìibwe mu Dyulu. Ne Ngùmvù masambila èbè ne Ndi mutùùlùke mpindyewu bwa kukwambila cidi cikòsela beena Yudà ne Yelusàlèmà, kuumukila ku mpindyewu too ne ku ndekeelu wa dikùmbana dya maalu ónsò, cintu cyònsò mu kaabujimà.”

105 Mpindyewu, nudi bumvwe anyi, nwènù kalaasa? Twètù mwa kujandula cidi mbingu makumi mwandamutekète eyi, tudi tumanye díbà didi dikùmbana dya maalu ónsò. Kaa, ekelekele! Nzambi àtùkwàcishèku bwa kucimanya. Cidi citùleeja anu menemene mwaba kampànda mu mabeji aa, menemene anu kuumukila ku cikondo aci too ne ku eci cikondo, too ne ku dikùmbana dya maalu ónsò, ne kacýàkupangila nansha kasunsa kamwepele to.

106 Mushindu mwine wùdì Díyi dinene dya Nzambi . . . Pààkenzà Nzambi buloba ne kubùtèeka mu cijèngù amu. Ne mwva nyiisha dilòòlò adi, mu dyalumingu dilòòlò, mùdìku kakùyi kantu nansha kàmwè kàpangila. Mona’s, buloba ebu bùdi bùyunguluka mu bupwàngàne bwònsò mu mushindu wà ne bàdi mwa kukwambila anu menemene díbà dyàpitakanà díbà ne ngondo, mu bidimu makumi abidi kuumukila ku leelu, pa kasunsa menemene. Mémè ncyèna mwa kukwambilaci, ku ntankù nansha umwe utùdì nendè pa buloba apa to; neàshaadilè ne tusunsa tubidi anyi tusatu ku ngondo, anyi neàpitè ne tusunsa tubidi anyi tusatu, wa mutàmbe bwìmpè utùdì nendè awu. Twètù katwènakù mwa kwenza cintu cipwàngàne nanku to. Bwalu, kùdì cintu cipwàngàne anu cimwepele, n’Nzambi. Ne Nzambi ne Díyi Dyèndè bidi cintu cimwe, pa nanku Díyi dya Nzambi ndidi dipwàngàne.

107 Nenku bu twètù mwa kujandula ówò matuku aa, netùjandulè anu menemene díbà diikalà dikùmbana dya maalu ónsò adi. Nudi nucýumvwa anyi? “Mmikòsa too ne ku dikùmbana dya maalu ónsò.” Mvnsa wa 24, “cisàmbà cyebe ne cimenga cyebe cya cijila,” cidi Yelusàlèmà. Tudi ne mvnsa wa 21. . . wa 24 kaaba aka. Yesu wàkatèèla cyòci eci mu Maatàayi 24.

108 Mpindyewu, Mwaneetu Collins, yèyèpù mu dinda emu, ncyèna mumanye ní ùdipù anyi kènàpu to. Mu nkonko ya dilòòlò adi, yèyè ùvwa mwele lukonko. (Ngeela meeji ne mbikùmbàne

bwa mêmè kucyàmba's, Mwaneetu Collins.) Pa ne: “Cinyangu cidi cifila kabütü, nwamönu's, civwäci cyümvwija?”

109 Yesu wàkaakulapù, mu Maatàayi nshapita wa 24, mutùdi tusangana. Eyowa, Maatàayi 24:15. Mpindyewu ngänji ngàngatè cyöci aci lükàsàlükàsà, bwa nùmonè ne ncinyi, Yesu wàkula pa cintu cimwecimwe aci kaaba aka, ùleedila ku Danyèlè. Maatàayi 24:15, bwenu nwènù bàdi báfùnda abu. Ndi muswe bwa ne, nwènù muntu ne muntu mpindyewu, nangàngà dilòlò edi ne—ne dyalumungu didi dilondà, nùlwayi ne crayons ne mabeji, bwalu tudi. . . ambà anu nwènù ne mukàbà wà méyi's, 24, ku mvensa wa 15: “Nenku ki bwa cinyi panwikalà. . .”

Nenku *ki bwa cinyi panwàmònà cinyangu cya dibütuka, cyàkambà Danyèlè mupròfetà, . . .*

Elàayi meeji! Eci mbidimu nkàmà yinaayi ne makumi mwandamukùlù ne bisatu, ne binaayi, ne bitaanu, makumi mwandamukùlù ne bisambombo kumpala. Bidimu nkàmà yinaayi ne makumi mwandamukùlù ne bisambombo kumpala.

*. . . Danyèlè mupròfetà, ciimàne mu mwaba wà cijila, . . .*

Mpindyewu tàngilà mu Bible webè amu. Cidi mu tubòko.

*. . . (ewu udi ubala, ùmvwè;)*

110 Mpindyewu, bàdiYe wàmabila aba mbeena Yudà. Mbaswe kumanya ne: “Kadi bìshi bwa ntempelu ewu? Neùpudiibwè cikondo kaayi? Neibakuludiibwè cikondo kaayi? Ncikondo kaayi ciikalàku kaküyi dibwe pamutù pàà dikwabo? Neashaalè too ne dîbà kaayi?”

111 KwambaYè ne: ‘Panwàmònà cinyangu cidi cifila dibütuka, ciimàne pàvwà. . .’ Danyèlè, ‘ciimàne mu mwaba wà cijila.’ Yèyè ne: “Panwàmònà cyöci eci cyènzeka, mpindyewu ewu udi ubala ùmvwè cidiye wàmaba aci.”

Ki bwa cinyi tudi tulòmba Nzambi, bwa àcivwijè cipwàngàne menemene, mu mushindu wà ne kakwikadikù mpatà nansha mikese to. Bwalu, katwèna ne cya kwela dyumvwija dyetu twètù ku bintu abi to. Bidì bikèngela bìvwile ku EMU MMÜDÌ MUKALENGE WÀMBA. Pa nanku, mêmè ndi ncishiya anu mwaba awu too ne pândi ngumvwa.

KumubuulwilaYè bintu byönsò, “cinyangu” aci.

112 Nenku, vùlukàayi ne, cidi ne dyumvwija pàbidì, anu mùdì: “Ndi mubiikile mwanàanyi bwa kupàtukayè mu Èjiipitù.” Mwàkabiikidiibwà Izaleela bwa kupàtukayè amu, ki mwàkadibi kabidi bwa Yesu, Mwan'Èndè, mubiikidiibwe bwa kupàtuka.

Nenku aci ki cyènzekà menemene, cya bushuwa anu mùndi mêmè mwimàne kaaba aka emu. Ne Yèyè wàkacyènza mu mushindu kampànda, ne Yèyè mmucisokòke cyönsò, musokòke Ekeleeziya cyönsò. Kaa, patwàbwelàmu, mu bintu bisambombo bya dyumvwa abi, mùdiYe musokòke Ekeleeziya byönsò, bwa

Ekeleeziya kwikalaYè mwindile ku kasunsa ne ku kasunsa, kàyi mumanye ne Yèyè ùvwa ùlwa dībà kaayi to. Kadi patùdi twakulangana apa cikondo cya Ekeleeziya cikaadi cyàmba kujika, pa nanku cikaadi anu pabwìpi mpindyewu bwa Dilwa, ciikàle anu cidìlongolola.

113 Ewu ngùmwe wà ku Mifùndù ya mitàmbe kwikala ne mushinga mu Mukàndà ewu. Wùdi wènza cinyi? Wùdi wàmba bwa dyoya dya ditùnga dya beena Yudà, beena Yudà. Ewu Mufùndù, mbingu makumi mwandamutekète, wùdi wùsokolola ne wàmba anu menemene kuumukila ku cikondo cìvwa Danyèlè mubange kuntwaku, too ne kundekeelu kwa dikùmbana dya maalu ònsò. Wùdi wumwe wà ku ntankù ya mitàmbe bunene. Mbanganyi bàtùku bangumvwe ngamba ne: “Wèwè muswe kumanya ne tudi dituku kaayi dya mu lumingu, tàngilà ku kabala-matùkù. Wèwè muswe kumanya dituku ditùdi ne mwoyi, tàngilà beena Yudà”? Ncya bushuwa. Ki kabala-matùkù kàa Nzambi nkòkò aku, kangacila anu apa mene. Mwena tèòlojì kanà yònsò, mumanyi wa dībàla wa Bible kanà yònsò, muntu kanà yònsò ewu, neàkwambilè ne ki ntankù nyèyè ewu, beena Yudà.

Mpindyewu tudi dībà kaayi? Tudi anu . . . bantu, bumvwe luuyà, kàa, mèmè . . .

114 Kacyèna citàngila bàà Bisàmbà bya bendè to; Bitampi Mwandamutekète ebi, Bipùpù Mwandamutekète, Makèngà Mwandamutekète, Mpungi Mwandamutekète, kabyèna bitàngila aci to. Ekeleeziya wa bàà Bisàmbà bya bendè neikàle mu Butùmbi diine dībà adi. Kabyèna bitùtàngila twètù to, twètù Ekeleeziya wa bàà Bisàmbà bya bendè. Ncitàngile anu Izaleela. “Danyèlè, cisàmbà cyebe ne Yelusàlèma.”

115 Mpindyewu, cidi cisokolola maalu àdi ènza ne Nzambi ùtu ùkwàta mudimu ne beena Yudà anu pàdìbo mu buloba bwabo. Aleluuyah! Mwaba awu ki wùndi mèmè ngeela meeji ne ncidi cilenga bwalu, anu mwaba awu.

Bàdi misangu yònsò anu bàteeta kubangila ku cikondo cìvwa Izaleela ùsanganyiibwa kuntwaku mu cikondo cya Danyèlè. Nenku mufùndi munene kampànda . . . Bwalu, ndi mumanye ne bamwe bàà ku bayiidi bèndè mbasòmbe kaaba aka, ncyàkucyàmba to. Kadi ki bwa cinyi bàakapeta bintu byònsò bya mafi ebi.

116 Nukààvwakù bamanyè mùvwà ba-Millérites, kumpala kwa kulwabo ba-Adventistes du Septième Jour, cyàkenzàbo kaaba aka anyi? Mu cidimu cya 1919, bàakadyènzela mapwàpwà, (nutu nwènù bònsò bamòne mu cibèjibeji cya Courrier), ne bàakabànda mwaba ewu bwa kubùuka kuyabò, mu dinda adi. Aci's cìvwa cyangacila pa mbingu makumi mwandamutekète ya Danyèlè. Uh-huh, ba-Millérites's. Pashìshe, paanyima, ne Mandamù Ellen White, uvwa mupròfetà wabò mukaji awu, kukùdimukabò e kudìbiikilabò ne mba-Adventistes du Septième

Jour. Kadi patùdi twakulangana apa bàashintùlùlù dîna bãshàadi beena Dîyi dya Ciprôfeta. Nwamònu anyi? Mènà asatu mashiilàngàne bwa kasumbù kamwekamwe aku.

<sup>117</sup> Mpindyewu, kadi's bàvwa batùpàkane, bwalu bàvwa bàteeta kwangata mbingu makumi mwandamutekète ayi bu ne nyà beena Yudà ne bàà Bisàmbà bya bendè musangu wumwe. Kadi Yèyè ùdi wàmba apa ne: “Mbwa cisàmbà cyebe.” Ne kacya Nzambi kàtùkù mwanjì kukwàta mudimu ne beena Yudà pambelu pàà Palestina to. Kadi Maasiyà awu, pa mbingu makumi mwandamutekète, ne mbingu yibidi, pàakuumushiibwàYe, (kaciyi bwa Yèyè mwine to; bwetu twètù, mbwàkuumushiibwàYe), Izaleela wàkatangalajii bwa, ne (kacya) yèyè kî mbaalukila mu buloba bwabo to anu mu bidimu bikese byàshàadi ebi. Pa nanku, cikondo kacivwa cibadiibwa muntwamu to bwa cikondo cya Ekeleeziya. Nudi nucyùm vwa anyi? [Disangisha dîdi dyàmba ne: “Amen.”—Muf.]

Kacivwakù cifwanyine kwikala cidimu cya 1919 nansha. Mèmè ndi mwa kuleeja ne cintu kampànda cyàkenzeka mu cidimu cya 1919, kadi apu mpàvwa Mwanjelo awu, pàakafidiibwà mukenji wà Mwanjelo mwisàtù awu ne Dikènga adi kupàtukadi. Menemene's. Kadi kacivwa... Apu mpàakiimanà mvita mu mushindu wà kabìyi byùm v wika to. Tudi twangata aci mu nshapita wa 7 patwàfikàku, patwàfikà ku nshapita wa 7 aku. Nukàadikù bònso bangumvwè nyiisha pa cyôci aci, misangu yàbùngì, nwamònu's, pàakambà mukenji wa Mwanjelo awu ne: “Lamàayi mpeepèlè yinaayi ya pa buloba ayi too ne patwàtwà beena Yudà citampì, basadidi abu.” Nenu mpindyewu, kushàalabò bindile too ne pàakajikà cikondo cya bàà Bisàmbà bya bendè.

Pashiishe pàabwelàYe mu cyalu, dîbà adi—dîbà adi ki pàatwàYe beena Yudà abu citampì, binunu lukànà ne makumi anaayi ne binaayi abu bàpeta Nyuma Mwîmpè. Ki binunu lukàmà ne makumi anaayi ne binaayi mbôbò abu, batwîbwe citampì. Bwàkabuulwibwà 7. Nukàadi bacibalè.

“Ne ngàkamòna bàabùngì menemene bamanè kwikala mu Dyulu,” Yone mumòne, “bàà cisàmbà cyònsò, bàà myakulu yònsò, ne ditùnga dyònsò, biimàne kumpala kwa Nzambi, ne malala mu byanza, bavwàle mizàbi mitòòke, bimba ne: ‘Aleluuyah! Amen! Butùmbi, lungenyi, lumù, ngulu, bukòlè, bìikalè kùdi Nzambi wetù kashidi ne kashidi. Amen!’ mwàkeelàbo lubilà.”

<sup>118</sup> Yone kàvwa mwa kuumvwa dîbà adi to. Kadi wàkatùma mèsù paanyima e kumòna pa Mukùnà wà Sinaayi, (butùmbi) bantu binunu lukàmà ne makumi anaayi ne binaayi bàvwa kabàyi bakooyike ne bakàjì to. Beena Yudà! Bakàjì, maèkèleeziyà! Kabàvwakù bakaashàale bàà ku malongolodi, ba-Luthériens, ba-Méthodistes, ba-Baptistes, ne ba-Presbytériens to. Kadi bôbò bàvwa beena Yudà kacya



anu ku ntwàdijilu, ba-Orthodoxes, ne biikàle ne ntempelu wabò kuntwaku, bàkuukwila pa Mukunà wà Sinaayi. Ki binunu lukàmà ne makumi anaayi ne binaayi mbyôbì abi. Aci mpaanyima pàà cyôci eci; Ekeleeziya ùkaadi mu Butùmbi. Nwamònu anyi?

<sup>119</sup> Pa nanku, Mukalenge Smith ùvwa mutùpàkàne, ki mùvwàbi ne cya kwikala. Bwalu, mmunyi muwàtèèka aci mu cidimu cya 1919 emu, kuumusha binunu lukama ne makumi anaayi ne binaayi abi? Dìbà adi's walukidì mu dilongesha dya ba-Russellites. Nwamònu anyi? Dìbà adi's walukidì buludì ku dilongesha dya ba-Russellistes, dya ne: "Yesu wàkalwa mu cidimu cya 1914, mu cidimu cya 1919 Yèyè kwangata Ekeleeziya Wendè, ne mpindyewu Yèyè ùdi mubidi musokòme wùdi wènda wùtàm bakana pa buloba, wùbiisha... wùya ku lukitá lwà kaakù-mukàji ne ku lukitá lwà kaakù-mulùme, ne wùbàjuula bònsò, bònsò bàvwà ba-Russellites abu." Macimbu naanyi's wè! Kabyèna bìleejakù ne mbya meeji mu Dìyi to. Kacyàkumwèkakù cijaalàme to. To, mukalenge. Kacyèna cìmwèka cijaalàme to.

<sup>120</sup> Kadi, Nzambi ngudi ne Bulelèlà. Ne Nzambi ki Udi mwa ku Cìbuulula ne ku Cìtèèkamù, ne kutùleeja Cì anu menemene, twètù. Nwamònu anyi? Mèmè ndi ngiitabuujà ne Yèyè neàcyènzè. Ncyèna mucìmanyè to. Ndi nzwambila Bulelèlà. Ncyèna mumanye to, kadi ndi ngiitabuujà. Ndi ngiitabuujà ne Yèyè neàcyènzè.

<sup>121</sup> Pa nanku, nudi numòna's, kacya Nzambi kàtukù mwanji kukwata mudimu ne beena Yudà. (Ndi muswe bwa nùkwatàayi eci mu meeji) pàdibi ne Izaleela . . .

<sup>122</sup> Ki mwaba wùmvwà nteeta kwambila mwaneetu udi musòmbe apa ewu, udi wamba bwa diya dya ku Izaleela awu ne, ditòlaayi kule ne Izaleela! Shààlaayi kule ne bwalu abu, nwènu bònsò bàdi bàmba bwa kukùdimwisha beena Yudà mucìma abu. Kumpala kwa Dìyiisha edi kujikadì, nenùmonè ne cidi ng'EMU MMÙDÌ MUKALENGÈ WÀMBA, ku Dìyi ne ku Nyuma. Izaleela awu's neàkudimwishiibwe mucìma, ditùngà dijimà, mu bufùkù bumwe. Bible ngudi mwambe nanku. Kadi Evanjeeliyo kèna nansha bwàbò bòbò to. Kùdi ndambu wa bàdi bapidye diitabuujà bàdi pambelu, ne bakwabo bàà mushindu awu, bàdi bàbwela, ne pambelu pàà mubidi mwena diinà wà beena Yudà, bàdi bàbwela ne bàpeta lupàndu. Aci ncyà bushuwa. Ndi ngiitabuujà aci ne mwoyi wànyì—wànyì wònsò.

Kadi, vùlukàayi ne, pàcidi anu Izaleela pambelu pàà ditùngà dyabo, kabèèna mwa kusùngidiibwakù to. Patùdi twakulangana apa ki kupinganabò eku. Nenku nebàsungidiibwè, ditùngà dijimà, mu ditùkù dimwe. Bible ngudi mwambe nanku. Ditùkù dimwe; necyàlujè, mu kaabujimà, Izaleela yònsò nkòòng kùdi Nzambi. Nekwikalè cintu cya bukolè bwa menemene cyalengà Izaleela dimwe dya ku matuku aa, mu mushindu wà ne necinyungishè ditùngà dijimà. Nansha mupròfetà mene wàkeela

lubilà lukolè, kwambayè ne: “Mu ditùkù dimwe mmuwénjì cyòci eci.” Mu ditùkù dimwe, bôbô nebàCimònè. Nekwikalè cintu cya bukolè.

<sup>123</sup> Wanyì mmwènenenu ùdi ne, neciikalè mupròfetà wa bukolè wājuuka ne kwimana kumpala kwa Izaleela, ne wabàjaadikila ne Maasiyà awu ùcìdi ne mwoyi. Maasiyà wákabèngabò awu ùdi...?...

<sup>124</sup> Patùdi twakulangana apa ki kubalanganabò ne Bible mukese awu eku, Bible wa Izaleela awu. Bàdi bàMubala bùùmukila paanyimà batàngìle kumpàla, mùdìbo bàMubala’s. S’nudi bamanyè mùdìbo bàfùnda mwakulu wà cyena Yudà amu. Nenukù pàdìbo bàMubala...Nenukù bàdi bàbala udi Lewi Pethrus mubàtùmine awu, Bibles mùliyò mujimà. Bàvwa bàmba ne: “Byôbì ne Yesu ewu...” Abu bàvwa mbeena Yudà bàvwàbo bafùme naabo ku Iran, ne kwònsò aku, bàtù kacya kabàyikù banji kuumvwa cintu pàacì ne m’Maasiyà abu. Ne pàakadìlongolòlòbo bwa kwalukila ku buloba bwàbò, mòna’s, kabàvwakù baswe kubànda mu ndèkè ayi to. Bôbò bàcìvwa bàdima anu ne matempu a kale a nkàsu awu. S’nutu bacìbalè mu cikàndàkàndà cya *Look*. Mbanganyi bàdi babalè tuumaalu atu mu bikàndàkànd-...bya *Look* ne *Times*? Mòna’s, s’nudi babalè cya bushuwa. Nwamònu anyi? Kabàvwakù baswe kubàndamù to. Laabi mukùlákàjì awu kwimanayè mwaba awu e kwambayè ne: “Vùlukàayi ne, mupròfetà wetù’s wákamba ne netwàlukilè ku buloba bwetu babànde pa mapwâpwà a nyuunyi wa mukanku.” Aleluuyah!

Matùngà àkaadi àpanduluka, Izaleela nyewu ùtàbuluka,  
Bimanyinu byàkadyànjàlà Bible kwamba;  
Matùkù a bàà Bisàmbà bya bendè mmabala,  
mùle tètè ne bintu bìdì bìkwàcishà bwôwà;  
“Alùkilaayi, Éyi nwènù bàdi batàngàlàke, kùdi beenu sungasunga.”

<sup>125</sup> Mbìmpè nùtabulukàayi. Nukàadi bacyùmvwè, bacyùmvwè ne bacyùmvwè, kadi neciikalè bwa musangu wà ndekeelu, dimwe dya matùkù àdì panshi aa. Izaleela nyewu wàlukila ku buloba bwèndè. Ditùkù dyàkòsà anu Nzambi ne Izaleela wàshàadi ditunga adi, ki ditùkù diikalà muntu mukwabo wa Bisàmbà bya bendè kàyikù mwa kusungidiibwa to.

<sup>126</sup> Nènjaadikè aci ne mbingu makumi mwandamutekète eyi, bu mèmè anu mwa kupeta òwò matùkù awu. Nènnye ku... bwa kupeta tubala-matùkù twà dilonga dya mabùlunga, ne—ne kàà Julien, dilonga dya mabùlunga, ne kàà beena Loomò, ne twònsò atu. Kùdi tukwabo kabidì, myaba kampànda. Kùdi cintu kampànda. Nzambi mmucìmanyè, ne, Yèyè—Yèyè ùdi ne bukolè bwa kucìbuulula. Nwamònu anyi? Ndi mumanye ne kabala-matùkù kàà Julien kàdi ne matùkù nkàmà yisatu ne makumi asambombo ne ataanu ne cya binaayi cimwe



dimanya ditàmbe kutwa ngwengwengwe dya mu tulaasa. Yèyè ngudi mutàmbe kumanya maalu a beena Èjiipitù.” Katanci aka anyì, beena Èjiipitù ne—ne bôbò bônso, bàkaavwa cintu cimwe.

<sup>132</sup> Cintu cimwecimwe aci ncidi cyenzèkèle ekeleeziya. Tudi bônso bayè kashàala ba-Méthodistes, anyì ba-Baptistes, anyì ba-Presbytériens. “Twètù biine’s mbàdì ne dipòlomè dya ku Hartford! Tudi ne dipòlomè dya ku Wheaton! Tudi ne dipòlomè dya ku mwaba mukwabo kampànda, anyì Bob Jones! Twètù, tudi ne dya Licence! Tudi ne dya D.D., LL.D., anyì cintu cikwabo kampànda!” Biine abi bìdì ne mushinga kaayi? Lukutukutu pa lwòlò’s.

Ki mùvwàbì mu Èjiipitù. Ne Nzambi kàakakwàtakù mudimu ne Izaleela to anu too ne pàakafikàye ku buloba bwèndè.

<sup>133</sup> Ntèèlèjaayi! EMU MMÙDÌ MUKALENGÈ WÀMBA, Nzambi kàakukwàtakù mudimu ne Ekeleeziya Wendè pàdiYe kàyi mwalùkile mu buloba abu to, Mukenji wà dîbà edi. Alùkilaayi ku cya ku cibangidilu! Ndàayi kule ne mmwènenenu yenu ya ci-Méthodiste, ci-Baptiste, ci-Presbytérien ayi; yenu ya cyena Mpenta, cyena Assemblées, ci-Unitaire, ci-Trinitaire, cyena Butaanu, byónso bidiku abi; cyena église de Dieu, ci-Nazaréen, ci-Pèlerin de la Sainteté, cyena église de Christ, nkwaka yónso ya mufwilakanyi ne Kilisto ayi! Nenku ndi mfika ku dyumvwa ne eci cidi cikafika pa buloba bujimà. Byónso abi mbya mafi; byónso mbya dyabulu. Kaa, ekelekele! Kùdì bantu bàà difwànà dya Nzambi mu cyónso cya ku byòbì abi. Kùdì bantu bàà difwànà dya Nzambi mu yónso wa ku nkwaka ayi. Kadi bulongolodi abu, mu bwòbù bwine, kî mbwà kùdì Nzambi nansha, ne Nzambi kàadyàkubùbèneshakù to. Kacya Yèyè kàtukù mubùbènèshe to.

<sup>134</sup> Ndi ndòmba bwa mulongi wa maalu-malonda kanà yónso (wèwè neuteelejè mukàbà wà méyi ewu) àmfùndile àngambilèku ne ndìbà kaayi, dikaadiku ekeleeziya mudyènzè bulongolodi, Nzambi kàyikù mumutèèke mu citàmbà ne kàciyi mwa kukwàtakù kabidi nendè mudimu. Ngambilaayi dîbà dikaadiYekù mujuulùlùle ba-Luthériens, Wesley ne ba-Méthodistes, anyì mwena Mpenta. Kacya kàtukù mucyènzè to! Bulongolodi abu bùvwa bùshàala mwaba awu, budiibwa kùdì kamunguji ne bùbola! Nzambi ùvwa wàngata bantu-nkààyà ne ùteeta bwa kufunkwina bantu buloba bwàbò. Ne pashiishe, bantu-nkààyà abu bàvwa bashàala ne butekètè bwa menemene ne bàvwijiibwa bilùmaabikàjì, biikàle ne dipòlomè dya mushindu kampànda, mu mushindu wà ne bàvwa bàlongolola bulongolodi bukwabo, bàbùvwija mwànà wa iferno misangu yibidi kutàmba mùvwàbu ku cibangidilu.

<sup>135</sup> Kadi, mu mwaba kampànda, cya bushuwa, Yehowah ùdì ne muntu udiYè mwa kutèeka byanza Byèndè, wíkala kàyikù mwa kudya naabo cibàngà to...-bùyì bùneemeka Nzambi,

bulongolodi bùdì kabùyi bùneemeka Nzambi abu; wíkala mwa kwaluja bantu ku Lubwebwe, Kilisto Yesu, ùbààluja ku mpenta wa ku cibangidilu ne Nyuma Mwîmpè wa ku cibangidilu, ne bimanyinu bya ku cibangidilu ne maalu a kukema a ku cibangidilu. Neya bushuwa ne Üdi nendè yèyè awu, mwaba kampànda, wíkala kàyi mwa kubilekela bwa dikèngeshiibwa dya mushindu kanà wònsò to, nànsha mwipata, mubènga, mwela nyimà, anyi nî ncinyi cikwabo; washààla naaci.

Kacya Nzambi kàtukù ùbènesha Izaleela to anu pàdiye ùkafika ku buloba bwèndè.

<sup>136</sup> Nzambi kààdyàkukubèneshakù to, wèwè Méthodiste, Baptiste, Presbytérien, Katolike, anyi Pelèrin de la Sainteté, Nazaréen, mwena église de Christ, anyi—anyi bulongolodi bwa beena Mpenta. Kààkunùbèneshilakù mu mushindu awu to. Alùkilaayi ku buloba bwenu, ku cibangidilu, ku dilabula dya mpenta mwàkenzekàdi mu Dituku dya Mpenta amu pàvwwà Bukole bwa Nzambi udi ne mwoyi bushintùlùle binunu bya bantu abu apu, ne bulàkùshe myoyi yabo ne Kapyà kàà Nzambi, kààkaleejà bimanyinu bishùwashùwàlè; kabìyi bitentula, kabìyi bya dibala dya mu meeji a bantu dikwàtakaja, kabìyi ditentula kampànda ne dikabwelè mu cinkùdìmbà mutùdi naaci mu Amerike emu eci to. “Nganyì udi mwa kwikala ne ntentà wa mutàmbe bunene?” Anyì ne: “Nganyì udi mwa kwikala ne musùmbà wa bantu wà mutàmbe bunene?” Biine abi bidi bishintulula cinyi bwa Nzambi? Nzambi mmuswe bwa bantu kwikalabò ne meeji matòoke mu myoyi yabo, kî mmusùmbà wa bantu munene nansha. Ne twètù bònsò tudi ne cinkùdìmbà muneemu emu, cyènzeka. Bundù kaayi, bwa kumòna ní tudikù mwa kusàkidila bantu bakwabo cinunu ku bulongolodi bwetu. S’mbundù. Yèyè mmuswe bwa twètù kwalukila ku Bulelèlà, kwalukila ku Nyuma, kwalukila ku Bukènkè bwa cya bushuwa, kwalukila ku cibeeba kampànda mu Kilisto, kwalukila ku Bulelèlà. Mmunyì mùdiYekù mwa kutùbènesha mushindu wutùyaayà ewu? Kààkutùbèneshakù to.

<sup>137</sup> Yèyè kàvwakù ùbènesha Izaleela to anu pààkaalukilàye ku buloba bulaya. Nenku pààkaalukilabo mu buloba bulaya, bimanyinu ne maalu a kukema byàkabanga kwenzeka. Yèyè wàkatùma muntu anu munkaci mwabo mene amu, dìnà dyèndè Mòsà. Ncinyi cyàkalwà naaci Mòsà ewu, tèlòlòji kampànda wa kapelu anyi? Wàkalwa ne dipòlomè dya Licencié anyi? Wàkalwa ne màpòlomè a LL.D., Ph.D. anyi? Yèyè wàkalwa ne bukole bwa Yehowah, ne mukenji wà ne: “Alùkilaayi, umùkaayi mu ebu buloba, nùye ku buloba bwenu. Alùkilaayi, Èyi nwènu bàdi batàngàlàke, nùye kùdi beenu sungasunga!” Amen!

<sup>138</sup> Kwènji bidimu bitwè ku binunu bibidi, bidì beena Yudà pambelu pàà buloba bwàbò, batàngàlàkàngàne ku mpeepèlè yinaayi ya buloba. Mushindu mwine wutùdi bafwànyine kwenza bwa Diiyisha edi kushààladì mbingu mpindyewu’s

wè, byôbi bikèngela bwa twêtù kulenga kantu ne kantu. Tudi mwa kulondeshulula Izaleela ne kuleeja ne ndîbà kaayi dyàkatangalajiibwàye kùdî Bukalenge bwalàbàle bwa Loomò, bwa dibèngà dyabo dya Maasiyà adi; mwàkatangalajiibwàye mu ditùngà ne ditunga dyònsò mwinshi mwa Dyulu.

Kwalukila ku Yakòbò, Izaleela, kwalukila mu Genese 44 ne 45, ne kuleeja kale wàwa mwàkabèneshàye bankambwà abu ne kubàmbilayè anu menemene mwaba wùvwàbo ne cya kwimanyina mu matùkù a ndekeelu. Ne mèmè ndi mwa kunùfunkwina anu menemene (ditùngà ne ditunga dyònsò) dya Izaleela, cisàmbà cyònsò cya Izaleela, ciimàne anu menemene mu matùngà mùdîbi byambùibwe ne mmùvwàci mwa kwikala. Kadi's ki twêtù aba leelu ewu.

<sup>139</sup> Mwena Yudà utùdî twêtù bamanyè awu, kî nyêyè awu mwena Yudà wa cya bushuwa to. Mwena Yudà wa cya bushuwa mmwena Orthodoxe mulelèlà awu udi kàyi mudikooyîshe ne bintu bya pa buloba to, udi kàyi mupàtùke muyè kashààla wa ku maèkèleeziyà makwabo to. Ki bàdî kwàka nàka munkacì mwa kwalukila, bàlàadila anu fromage ne mampà, pa nseke ya tukùnà, kabàyi baanyîshùibwe mu cimenga cya kale aci to. Bikèngela bàdîbakilè cimenga lwà ku luseke elu, mu buloba bùdî kabùyî bwa muntu to, ne bingoma bya mwambùùyî bitàngija nseke yònsò. Kadi mmubangè kwela ntòngà. Amen, ne amen! Cikondo cikaadi pabwipi.

<sup>140</sup> Kùdî Ishàmèlà ne Izàkà, biimàne kwàka, bacikàle bàkòkangana bwa buloba, too ne patùdî twakulangana apa, kadi buloba's mbwà Izaleela. Byôbi byenzè ne ùye mu Yelusàlèmà mupyamùpyà awu, kabàakukwanyishila bwa ùye mu Yelusàlèmà wa kale to. Bikèngela wèwè kwanji kuya mwómò amu bwa bàkuumvwijèci cyònsò, ba-Arabes abu, pashiishe bàye neebe luseke lukwabo alu. Ki bânà bàà Ishàmèlà mbòbò abu. Kadi, indilaayi, nekùlwe cikondo cyàbwàngatà bânà bàà Nzambi ku bukòkeshi bwàbò. Ncya bushuwa. Yelusàlèmà nèibakuludiibwè. Mulàmbù wà bwàcyàbwàcyà newùteekiibwè.

Ne mufwilakanyi ne Kilisto neenzè cipungidi bwa mbingu mwandamutekète ya ndekeelu ayi. Kadi munkacì mwàyî amu, yèyè neashipè cipungidi aci, àbàbwejè bònsò mu cyena Katolike. Cinyangu necitangalake pa cintu cyònsò nkòong, mushindu awu, ne pashiishe nshùikidilu nealwe.

<sup>141</sup> Tàngilàayi, "mbingu makumi mwandamutekète." Eyowa, kùkaadi bidimu bitwè ku binunu bibidi bìdîbo kabàyikù to; mbiipàciibwe patùdî twakulangana apa, cisàmbà cyabo; mwàkadîbi mu cikondo cya dipapisha dya mwoyi wa Pàlò amu, byàkakèngela bwa kupapishaYè mwoyi wà Hitler. Miliyò ya bantu yàkafwà. Tàngilàayi Eichmann ewu, ne dipiila dya kushebeya kwa miliyò yisambombo ya beena Yudà. Miliyò yisambombo mijimà, misùukà ya bantu, bânà bàà mu maboko, bânà, bakùlumpè, bashebeya bònsò; Eichmann, muntu

umwepele. Tàngilààyi Russie, munwàkabiipatà muntwamu. Kubiipatabò mu myaba yònsò. Bàdi cisàmbà cipeetula.

142 Kadi bwa dinanga dya lupetu lwabo, kwalukilabò cyàkàbìdi. Kadi banyàabanya abu bàdi munkaci mwa kwalukila mu Pàlèstinà. Amen, bàna beetu! Panùdì numumòna ùbanga kwalukila mu buloba bwèndè!

143 Bàkaadi naabo búngì bukùmbàne muntwamu mpindyewu bwa kwenzabò pabwìpì ne binunu lukama ne makumi anaayi ne binaayi abi. Kadi cìdì cyènzekà ncinyì? Nebàmanyè Yòzefù wabò. Kanùditàcishi to. Eyowa's, mukalenge. Ne bóbò bònsò mbiimàne kuntwaku bindile bwa kwenzekaci. Kadi pa díbà mene diikalà . . .

144 Matùngà àmbì patòòke ne bóbò bàshàadi ditùngà, cidimu cyàshàadi eci. Pàdì anu aci cyènzeka, tudi pabwìpì ne nshìikidilu, Ekeleeziya wa bàà Bisàmbà bya bendè neikalè muyè. Pa nanku, pa díbà kanà dyònsò, Nzambi's mmufwànyine kwamba ne: "Izaleela ncisàmbà Cyànyì." Pàdì aci cyènzeka, Bisàmbà bya bendè kwàbì kwàjìkì.

145 "Nebàdyatakajè ku makàsà," mwàkambà Yesu, mu Maatàayi 24. "Cinyangu cidi citwàla kabùtù, nebàdyatakajè ku makàsà ngumbu ya Yelusàlèmà too ne pààjìkà cipungu cya bàà Bisàmbà bya bendè." Pààjìkà aci, pashìishe ki beena Yudà kwalukilabò mu Yelusàlèmà, bwa kwibakululabò ntempelu ne dikuukwila dya mu ntempelu. Netùpetè byònsò abi mu Mayiisha àdì àlondà aa, mbingu makumi mwandamutekète ya twipàcìlì tusambombo.

Mpindyewu nèmbalè cyòci aci kumpala kwa mèmè kujikija, bwalu tudi bafwànyine kwikala pabwìpì ne díbà dya kwalukila mu mèètù díbà adi, pashìishe kwalukila dilòòlò pa díbà mwandamutekète.

146 Dyàmbedi, dyàmbedi, panwikalà nucifùnda: "Bwa kulekeesha dishipa dya mikenji." Danyèlè, nshapita wa 9, mvensa wa 24. "Bwa kulekeesha dishipa dya mikenji," umwe. "Kujikija mpekaatu," ibidi. "Kwenza dipungisha bwa bubì," isatu. "Kubweja bwakànè bwa kashidi," inaayi. "Kutwa citampì ku cikèènà-kumòna ne ku cipròfetà," itaanu. "Kwela Mutàmbe cijila maanyi," isambombo. Nenu abi ki bitwàkwilàpu dilòòlò edi. Nzambi, ùbyenzeja!

147 Mpindyewu indilaayi, ngànji mbyàmbùlùlè, bwa nwamòna mwa kubìkwàta. Cya kumpala, "kulekeesha dishipa dya mikenji." Ciibìdì, "kujikija mpekaatu." Ciiisàtù, "kwenza dipungisha bwa bubì." Ciinàyi, "kubweja bwakànè bwa kashidi." Ciitànù, "kutwa citampì ku cikèènà-kumòna ne ku cipròfetà," Ciisambombo, "kwela Mutàmbe cijila maanyi."

Ngànji nnùbadilèci mpindyewu, mu—mu Bible. Mmvensa wa 24.

*Mbingu mwandamutekèt-. . . mmikòsela cisàmbà cyebe (beena Yudà) ne cimenga cyebe cya cijila—cimenga cyebe cya cijila (Izaleela, beena Yudà, Yèlusàlèmà), bwa kulekeesha. . . dishipa dya mikenji (umwe), . . . bwa kujikija mpekaatu (ibidi), . . . bwa kwenza dipungisha bwa bubì (isatu), . . . bwa kubweja bwakànè bwa kashidi (inaayi), ne kutwà citampì ku cikèènà-kumòna (itaanu)—ku cikèènà-kumòna ne ku cipròfetà, ne kwela Mutàmbe cijila maanyi (isambombo).*

148 Ncyôci aci menemene cyàkalwàYe bwa kumwambila, civwà mwa kwenjiibwa, ne pashiishe nshiikidilu ùvwa mwa kulwa.

149 Mpindyewu, dilòlò edi netwàngatè cidi byòbì bintu abi, ne kumòna mutùdì pabwìpì ne mwaba awu. Ne pashiishe mu dyàlumingu dilwalwà, kutwàla ne kutèeka tuubintu twa cikondo etu anu menemene mwaba wutùdì twètù tusanganyiibwa. Mèmè ndi muMunange.

150 Izaleela wàlukila ku buloba bwèndè, Izaleela. Ngǎnjì ngǎmbè anu eci mpindyewu patùcidi. . . ngeela meeji ne kacỳèna cikwaciibwa pa mukàbà wa mèyì to. Ngǎnjì ngǎmbè eci. Pa dîbà mene didì Izaleela ùshààla ditùnga. . . Cîntu misangu yònsò anu ngeelela meeji, kumpala kwa kalaasa kàanyi aka ne, kùvwa cintu kampànda cîmvwàku mufwànyìne kwenzamù, kumpala kwa mèmè kufwa, anyì kwaluja Izaleela kùdì Mukalenge. Bwalu, dîbà mene, bilondèshile mukàndà wà cibùcilu wà Amerike Mujimà, divwàbo bambè patòoke ne Izaleela wàshàadi ditùnga adi, bwa musangu wà kumpala kùkaadi bidimu binunu bibidi kacya anu bàatangalajiibwa, kabàyi cisàmbà to; pàvwa mpa dîbà dimwedimwe adi, dîbà adi menemene, divwà Mwanjelo wa Mukalenge mutwilàngàne naanyi kuntu kwàka ne muntùme ku. . . ne Evanjeeliyo. Cintu anu cimwecimwe aci, mu matùkù 7 a ngondo mwiànù, cidimu cya 1946.

151 Mpindyewu, pashiishe, cikwabo cintu cidi cìmfikishà ku dimanya. Cidi “dyalujulula dya myoyi ya bânà kùdì baataatù, ne myoyi ya baataatù kùdì bânà,” Mukenji. Mònaayi, Maalàkì 4 (kî nyi3 to), 4!

152 Cikwabo cintu. Mwanàanyi Billy, ne mèmè, ne Mwaneetu Ern Baxter, pàtùvwà mu njila batàngile ku Pàlèstinà. paanyima pàà twètù bamane kutwilangana ne beena Yudà kwa Mwaneetu Arganbright, ne bamòne disangisha adi. Lewi Pethrus ùvwa mutùme Bibles eyi kuntwaku. Ki kwambayè. . . Beena Yudà aba bàvwa balwè, bàmba ne: “Bu wèwè mwa kubiiqidishakù musumbà wà balombodi bàà Izaleela, ndi muswe kwamba ne, kî mbaalaabi bapyabàpyà bàdì ne mishingà yabo yònsò aba to, kadi kukùngwija balombodi balelèlè bàà Izaleela. Twètù tudi babalè Dipungila Dipyadìpyà edi, kadi tudi bamanyè ne pààlwà Maasiyà awu, Yèyè neàtwàmbilè maalu aa, mwàkambà mukàjì wa mu Sàmaalèyà awu. Tudi bamanyè ne Mòsà wàkamba ne



Maasiyà wetù awu ùvwa mwa kwikala mupròfetà. Nenku bu wèwè mwa kubàmbila ne kubàleeja, ku Mifundù,” yitwàngatà mu Diyiisha dya dilòlòlò edi ayi, “ne bìvwa bìkèngela bwa kufofomijiibwabò ne myoyi yabo kupangishiibwayi, bwa kaaba kàà bàà Bisàmbà bya bendè kulwakù, bwa twamònakù mwa kupeta cikondo cya kupungisha bwa bàà Bisàmba bya bendè. Ne myoyi yabo yìvwa mipapisha menemene anu mwàkadibi mu cikondo cya Yözefù amu, ne bikwabo. Ne pashiishe kubiikidisha beena Yudà abu mu mwaba kampànda, kubiikidila bantu abu mu batèèleji, anu mùtù wenza ne bàà Bisàmbà bya bendè aba muneemu, ku disonsodiibwa dya Nyuma adi amu. Bwalu,” mwàkambàbo, “Yesu ewu, byòbì ne Yèyè kì Maasiyà awu, ne mèyì èbè òwò malelèlà, díbà adi’s Yèyè kì mmufwe to, Ùdi ne mwoyi. Ne piikalàbi ne Ùdi ne mwoyi, Yèyè’s wàkalaya ne neikalè mu Wendè. . . musadid- . . musadidi—basadidi Bèndè, bayiidi Bèndè. Ne twètù mwa kuMumòna wènzà cimanyinu cya mupròfetà, díbà adi netwitabuuje ne Yèyè m’Maasiyà awu.”

Cintu cipwàngàne kaayipu’s wè, cya bushuwa menemene. Díbà adi, aci ncifwànyine kwenza cinyi? Ditungà’s ndifwànyine kulediibwa mu ditùkù dimwe, munkaci mwa balombodi. Muntu ne muntu wa kùdìbo’s mmufwànyine kwamba ne: “Tudi bacimanyè.” Pàdi laabi awu wàmba nanku apu, aci’s ncikòse bwalu. Ditungà’s ndifwànyine kulediibwa mu ditùkù dimwe. Izaleela’s mmufwànyine kulediibwa mu dituku dimwe.

<sup>153</sup> Nenku mvwa mu njila, ne mwimàne mu Caire, mu Èjiipitù, ne ticket twa cyanza, ne tusunsa dikumi ne tutaanu anyi makumi abidi twa cikondo cya kutùbùkilabò. Bàkaavwa pa kubiikila. Ki mèmè kuya bwa kamònakù kapesè kakese kàà dibaya dya èbène, kiikàle ne kanzevu kakese kenza kàà èbène, kiikàle ne—ne kaamubanga kàà nzevu aku. Mvwa muswe kukàtùmina mulunda wanyì ngàngàbukà, Ngàngàbukà Sam Adair, bu cfinakaji cya mabeji. Nenku mvwa munkaci mwa kukàtàngila. Ki Cintu kampànda kungambilaci ne: “Edi díbà kì ndyanji kwikala dyòdì adi to. Shààla pambelu pàà Pàlèstìnà.”

<sup>154</sup> Ki mèmè kudyàmbidila ne: “Awu’s ùvwa anu mmèmè ndyèlela meeji’s.” Ki mèmè kutungunuka.

Cintu kampànda kwamba ne: “Edi díbà kì ndyòdì adi to.”

<sup>155</sup> Ki mèmè kupàtuka kuya paanyima pàà ditanda adi. Mèmè kujuula mutù wànyì kùdì Nzambi. Mèmè kwamba ne: “Nzambi, ùvwa ng’Wèwè uvwa wakula naanyì awu anyi?”

<sup>156</sup> KwambaYe: “Edi díbà kì ndyòdì adi to. Shààla pambelu pàà Pàlèstìnà. Eci cikondo kì ncyòcì aci to.” Ki mèmè kwangata ticket wanyì awu e kumushintulula, kuumuka kwònsò aku e kuya ku Loomò, ne kwalukila ku Lisbon, mu Portugal, nguumuka aku ngaalukila mu États-Unis.

<sup>157</sup> Díbà kadìvwa dyanji kukùmbana to. Bubì bwa bàà Bisàmbà bya bendè kì mbwanji kuula to, too ne pa mishikù ya

dikopo. Kadi dîngà ditùkù necyènzekè, ne Nzambi neàtumè muntu kampànda kuntwaku udi mupròfetà, ne yèyè awu neàbàjaadikilè. Ndi mutwishiiibwe ne Nzambi neàmujuulè kàyi ùjànguluka to, nansha yèyè mwa kwikala nganyi, ùmujuula lukàsà. Ndi ngitabuuja ne cidi ne cya kwenzeka. Ki citùdi tulongela byòbi ebi, mbwalu tukàadi pabwîpi menemene.

158 Nenku, vùlukàayi ne, mu kasunsa mene kàdi beena Yudà bàakidila Kilisto amu, Ekeleeziya wa bàà Bisàmbà bya bendè ùkaadi muyè. Dîbà adi bàà Bisàmbà bya bendè bàdi bàmona bipùpù bipòngolodiibwa pa bôbò, Dikèngà dinene.

159 Kadi—kadi mushindu mwine’s wùdi bantu, balongeshi banene mwa kulongesha, ne bàtàngila Bible ewu mushindu ewu, kadi bàmba ne Ekeleeziya ùdi ùpicila mu cikondo cya Dikèngà dinene, pàdikù kakùyi Mufundù mu Bible wùcyamba! Kabèena ne cintu nansha cimwe to.

160 Muntu mmungambile, anu abidi àdi panshi aa, wàmba ne: “Kaa, Mwaneetu wa bakàji McPherson’s mmulongeshe ne Ekeleeziya neàpicilè mu Dikèngà dinene, bwalu twètù netùkenkeshè makènkè mu cyòci cikondo aci.” Ny’Izaleela dîbà adi, kî mbàà Bisàmbà bya bendè to.

Bàà Bisàmbà bya bendè mbamanè kuya, Ekeleeziya. Kabyèna bikèngela bwa kupicilabò mu Dikèngà dinene nansha dimwe to. “Dragon wàkapwidijila màyi mukana mwèndè,” nshapita wa 17, “ne wàkenza bàshàadilè mvita,” virgo mikùtākàne ayi. Kí. . . Ekeleeziya mulelèlè mmumane kuya. Ùkaadi mu Didya dya Dibanji bwa, citùpà cya dîbà cùkalà Didya dya Dibanji munkaci mwa kwenzeka aci, lumingu lwà ndekeelu alu. Nenku dîbà adi ki dyènzekà Dikèngà dinene, dyàjuukà mikùmbi ya lukòsetà ne dikèngesha pa maèkèleeziyà, bintu bya mushindu awu.

Pashiishe, ku ndekeelu, mu nshapita wa 19, ki Yèyè ulwàlwa ewu ne Mubàki Wendè. Aleluuyah! “Mfumu wa bamfumu, ne Mukalenge wa bakalenge; cinkutu cizabika mu Mashì, ne cilwìlu cya mu Dyulu cibànde pa tubalu tutòoke, bàlwa Nendè. Ki Mukàji—musèla ulwàlwa wàwa, bwa kwangata kaaba Kèndè mu Bukalenge bwa bidimu cinunu. Amen! Kaa!

Dîna adi dibeneshiibwè, kaa, Dîna adi  
dibeneshiibwè,  
Dîna dya Mukalenge dibeneshiibwè;  
Dîna adi dibeneshiibwè, kaa, Dîna adi  
dibeneshiibwè,  
Dîna dya Mukalenge dibeneshiibwè.

Yesu ki Dîna, Yesu ki Dîna,  
Yesu ki Dîna dya Mukalenge;  
Yesu ki Dîna, kaa, Yesu ki Dîna  
Yesu ki Dîna dya Mukalenge.

Tùmbishàayi Dìna Dyèndè, kaa, tùmbishàayi  
 Dìna Dyèndè,  
 Kaa, tùmbishàayi Dìna dya Mukalenge;  
 Tùmbishàayi Dìna, kaa, tùmbishàayi Dìna,  
 Tùmbishàayi Dìna dya Mukalenge.

<sup>161</sup> Udi ucyènza bìshi? Udi uDìvwija dinene mu nsòmbelu webè. Ikàlà ne nsòmbelu wa bôbò mwa kwamba ne: “Musadidi wa Kilisto nyèyè wàwa.” Mushindu awu ki wùdì utùmbisha Dìna adi. Tùmonàayibi. Kaa, kanwènaayikù baMunangè anyi? Kaa, ekelekele! Kaamusambu keetu kakese aku mpindyewu:

Mu cidìilù cya ngombe kùkaadi ntàntà mule,  
 ndi mumanye ne mmùdìbi cya bushuwa,  
 Mwànà wa mu dibòkò wàkalediibwa bwa  
 kusùngila bantu ku mpekaatu wabò.  
 Yone wàkaMumòna ku mwelelu wà musùlù,  
 Mwànà wa mukooko bwa kashidi,

Mwànà wa mukooko awu ne Bitampì Mwandamutekète abi, Umwèpelè mu Dyulu ne pa buloba uvwa mwa kucyàngata.

Mu cidìilù cya ngombe—mu cidìilù cya ngombe  
 kùkaadi ntàntà mule, ndi mumanye ne  
 mmùdìbi cya bushuwa,  
 Mwànà wa mu diboko wàkalediibwa bwa  
 kusùngila bantu ku mpekaatu wabò.  
 Yone wàkaMumòna ku mwelelu wà musùlù,  
 Mwànà wa mukooko bwa kashidi,  
 Kaa, Dìna dya Mukalenge dìbeneshiibwè.

Kaa, Dìna adi dìbeneshiibwè, kaa, Dìna adi  
 dìbeneshiibwè,  
 Dìna dya Mukalenge dìbeneshiibwè;  
 Dìna adi dìbeneshiibwè, Dìna adi  
 dìbeneshiibwè,  
 Dìna dya Mukalenge dìbeneshiibwè.

<sup>162</sup> Mémè ntu munange kukuukwila. Kadi nwènu? Mpindyewu, katùtu tulwa mu ekeleeziya anu bwa kutèeleja diyiiisha to; aci cidi cyènda pamwe naaci. Kadi tulwàlwa mu ekeleeziya mbwà kukuukwila, kukuukwila mu Nyuma ne mu Bulelèlè. Nuumvù Bulelèlè, Dìyi ndyòdi adi. Nwamònu anyi? Mpindyewu, kukuukwila, nkudyumvwija wèwè mwine kùdìYe. Nwamònu anyi?

*Kaa, Ndi Munangè Mulùme Wa Mu Ngalèlè Awu, tùpèèshèku cyonà ndambu pa cyòci aci. Eyowa's, mukalenge. Udi muwùmanyè anyi, Teddy? Nyewu ngápù mwoyi mpindyewu. Twánjibi kumòna. Twánjibi kumòna.*

Kaa, ndi munange Mulùme wa mu Ngalèlè, wa  
 mu Ngaalèlè awu,  
 Bwalu Yèyè mmungenzèle byàbúngi be.

Mmumfwile luse ku mpekaatu yànyì yònsò,  
muntèèke Nyuma Mwîmpè munda;  
Kaa, ndi munange, ndi munange Mulùme wa  
mu Ngalèlè awu.

Mumpùblikaanò wàkaya bwa kusambila mu  
ntempelu amu dîngà dituku,  
Kwelayè lubilà ne: “Éyi Mukalenge, ikàlàku  
naanyi luse!”

Kufwidiibwayè luse ku mpekaatu ne  
mpekaatu yònsò, ne ditalala dya ndòndò  
dyàkatèèkiibwa munda mwèndè;

Kwambayè ne: “Lwâyi, kanùmonààyi Mulùme  
wa mu Ngalèlè ewu.”

Kaa, ndi munange Mulùme wa mu Ngalèlè  
awu, wa mu Ngalèlè awu,

Bwalu Yèyè mmungenzèle byàbûngì be.

Mmumfwile luse ku mpekaatu wanyì yònsò,  
muntèèke Nyuma Mwîmpè munda;

Kaa, ndi munange, ndi munange Mulùme wa  
mu Ngalèlè awu.

Mulèmà wàkafikishiibwa ku dyendela kuulu,  
kamàmà kààkafikishiibwa ku dyakula,  
Bukole abu bwàkambiibwa ne dinanga pa  
mbû.

Mpofo wàkafikishiibwa ku dimòna, ndi  
mumanye ne civwà mwa kwikala anu

Bukole bwa Mulùme wa mu Ngalèlè awu abu.

Kaa, ndi munange Mulùme wa mu Ngalèlè,  
wa mu Ngalèlè awu,

Bwalu Yèyè mmungenzèle byàbûngì be.

Mmumfwile luse ku mpekaatu wanyì yònsò,  
muntèèke Nyuma Mwîmpè awu munda;

Kaa, ndi munange, ndi munange Mulùme wa  
mu Ngalèlè awu.

Tèèlejààyaaku eci nunku:

Mukàjì wa ku ciinà cya mâyi awu, Yèyè  
wàkamba mpekaatu yèndè yònsò,

Mùkaavwàye ne balùmè bataanu musangu  
awu. (Ki Yèyè awu's.)

Kufwidiibwayè luse ku mpekaatu ne mpekaatu  
yònsò, ne ditalala dya ndòndò kulwadi  
munda mwèndè;

Ki kwelayè lubilà ne: “Lwâyi, kanùmonààyi  
Mulùme wa mu Ngalèlè awu!”

Kaa, ndi munange Mulùme wa mu Ngalèlè, wa  
mu Ngalèlè awu,

Bwalu Yèyè mmungenzèle byàbûngì be.

Mmumfwile luse ku mpekaatu wanyì yònsò,  
muntèèke Nyuma Mwimpè munda.

Kaa, ndi munange, ndi munange Mulume wa  
mu Ngalèlà awu.

Ndi muMunange. Kadi nwénù? Ne mwoyi wànyì wònsò! Kadi  
nwénù? Yèyè kî mmukèmeshanganyi anyi?

Kaa, mukèmeshanganyi, mukèmeshanganyi, ki  
cìdì Yesu bwànyì mèmè, (Ûdi cinyi?)

Mubedyanganyi, Mfumu wa Ditalala, Nzambi  
wa Bukole n'Yèyè;

Kaa, ùnsùngila, ùndama ku mpekaatu ne  
mpekaatu yònsò ne ku bundù,

Mukèmeshanganyi ncìdì Mupikudi wanyì,  
tùmbishàayi Dìnà Dyèndè!

Twinyikàayi anu mitu yetu mpindyewu ne twèlanganàayipù  
meeji.

Kale wàwa mvwa mujimìne, kadi mpindyewu  
ndi mupetulula, ndi musùùlùdìibwe ku  
dipiila, (Matùngà àdì àpandulukà; kî mbwalu  
to.)

Yesu ùdi ùfila budìshikaminyi ne  
disùngidiibwa mu kaabujimà;

Ûdi ùnsùngila, Ûdi ùndama ku mpekaatu ne  
mpekaatu yònsò ne ku bundù,

Mukèmeshanganyi ncìdì Mupikudi wanyì,  
tùmbishàayi Dìnà Dyèndè!

Kaa, mukèmeshanganyi, mukèmeshanganyi, ki  
cìdì Yesu bwànyì mèmè,

Mubedyanganyi, Mfumu wa Ditalala, Nzambi  
wa Bukole n'Yèyè;

Ùnsùngila, ùndama ku mpekaatu ne mpekaatu  
yònsò ne ku bundù,

Mukèmeshanganyi ncìdì Mupikudi wanyì,  
tùmbishàayi Dìnà Dyèndè!

Kaa, anji elàayikù meeji ku bwalu abu!

Kale wàwa mvwa mujimìne, kadi mpindyewu  
ndi mupetulula, ndi musùùlùdìibwe ku  
dipiila,

Yesu ùdi ùfila budìshikaminyi ne  
disùngidiibwa mu kaabujimà;

Ùnsùngila, (Yèyè ùdi wènza cinyi?) ùndama ku  
mpekaatu ne mpekaatu yònsò ne ku bundù,  
(Ngendela pamutù pààbì.)

Kaa, mukèmeshanganyi ncìdì Mupikudi  
wanyì, tùmbishàayi Dìnà Dyèndè!

Bònsò pàmwè mpindyewu!

Kaa, mukèmeshanganyi, mukèmeshanganyi, ki  
 cidi Yesu bwanyi mèmè,  
 Mubedyanganyi, Mfumu wa Ditalala, Nzambi  
 wa Bukole n'Yèyè;  
 Mòna's, ùnsungila, ùndama ku mpekaatu ne  
 mpekaatu yònsò ne ku bundù,  
 Mukèmeshanganyi ncidi Mupikudi wanyì,  
 tumbishàayi Dinà Dyèndè!

Kaa, mushindu mwine wùndi munange Yesu,  
 (Butùmbi's wè!)

Kaa, mushindu mwine wùndi munange . . .

Ndi ne disanka dyàbùngì mùndi musungidiibwe! Ndi ne  
 disanka dyàbùngì mùndi mwindile Dilwa Dyèndè!

Kaa, mushindu mwine wùndi munange Yesu,  
 Bwalu Yèyè wàkannanga kumpala.

Mpindyewu ne byanza byetu byela muulu, piikalàbi ne tudi  
 twambilamù.

NcyàdyàkuMulekelakù to,  
 NcyàdyàkuMulekelakù to,  
 NcyàdyàkuMulekelakù to,  
 Bwalu Yèyè wàkannanga kumpala.

<sup>163</sup> Nudi baMunangè anyi? [Disangisha didi dyamba ne:  
 “Eyowa.”—Muf.] Dìbà adi bikèngela nùngangane muntu ne  
 mukwèndè. Bwalu, wèwè kùyi munange aba baùdi mène mwa  
 kumòna apa abu to, mmunyi mùdi mwa kunanga Ewu Ûdi kùyi  
 mumòne? Tùlabulanganàayi ku cyanza muntu ne mukwèndè,  
 twamba ne:

Kaa, mushindu mwine wùndi munange Yesu,  
 Kaa, mushindu mwine wùndi munange Yesu,  
 Kaa, mushindu mwine wùndi munange Yesu,  
 Bwalu Yèyè wàkannanga kumpala.

Ncyàdyà- . . .

Elàayi byanza byenu muulu kùdiYe mpindyewu. Ki cyòci  
 aci.

. . .kuMulekelakù to,  
 NcyàdyàkuMulekelakù to,  
 NcyàdyàkuMulekelakù to,  
 Bwalu Yèyè wàkannanga kumpala.

<sup>164</sup> Anjì elàayibi meeji, Yèyè ngudi mutùmanyishe dibuulula  
 dinene adi. Katwènaayikù baMunangè anyi? Yèyè kí  
 mmukèmeshanganyi anyi? Mushindu mwine wutùdi ne  
 kusàkidila kùdi Mukalenge wetù Yesu; kàyi ùtùlekelakù  
 to. “Mòna, Ndi neenù, too ne. . .” *Mbingu Makùmi  
 Mwandamutekètè Yà Danyèlè* yidi yìnùsànkisha anyi?  
 [Disangisha didi dyamba ne: “Amen.”—Muf.] Kaa, katwènakù  
 baMunangè anyi? Cidi cyènza bishi?

Diitabuuja dyànyi nditàngile Kùdì,  
Wèwè Mwànà wa Mukooko wa ku Kalvariyo,  
Musùngidi . . .

Mukuukwilè anu cyanààna, byùmukila munda mwa mwoyi wèbè amu.

Mpindyewu ngumvwilèku pândi nsambila apa,  
Umùshàku mpekaatu yànyi yònsò,  
Éyi anyishàku bwa kuumukila ku leelu  
Mémè yònsò ngiikalè Webè!

Pândi ngendela mu nyòngòlò wa mîdimà wa  
njila mibwelàkàne wa panwapa apa, (Ki  
mutùdì twendela bònsò.)

Ne pàdì lutàtù lùpaasalala lunnyùngulukila,  
(Eyowa's, Mukalenge.)

Wèwè ikàlà anu Mulombodi wanyì;  
(Wenda undombola pândi mpìcilamù apu,  
Mukalenge!)

Kaa, tuminàku mîdimà dîyi bwa yàndamukè  
mundaamuunyà,  
Kùpulàku bwôwà bwa tunyinganyinga,  
Kùndekèdìku mpàmbuka  
Nya kule ne luseke Lwebe to.

[Maneetu Branham ùdi wimbila mu matàma *Diitabuuja Dyànyi Nditàngile Kùdì*—Muf.]

Dikàndà kùdì mwoyi wànyi wùdì wàmba  
kwimana ewu,  
Sonsòlàku lukunukunu lwànyi;  
Tuminàku mîdimà dîyi bwa yàndamukè  
mundaamuunyà,  
Kùpulàku bwôwà bwànyi bwònsò,  
Éyi anyishàku bwa kuumukila ku leelu  
Mémè yònsò ngiikalè Webe!


<sup>165</sup> Éyi Yesu, tudi tumòna ne tudi twenda tuseemena pabwìpì ne cintu kampànda. Yeshàayi mupròfetà wàkacyàmba; Yelèmiyà wàkacyàmba. Danyèlè wàkatàngila paanyimà ne wàkamòna cyàkambàbo aci. Cyàkafikisha mwoyi wèndè ku dibìnduluka, ki yèyè—yèyè kutàngijayè mpala mu Dyulu. Kwenzayè dijila dya byàkudyà, kutwàlayè mufuku ne kudyèlayè butù pambidi. Ûvwa muswe kuumvwa, bwa kumònayè mwa kudimwija bantu.

<sup>166</sup> Mukalenge, nyewu tumwèna ku Mikàndà Yebe, kadibi, ku Mukanda Wèbè, Mukàndà wà Yeshàayi, Mukàndà wà Yelèmiyà, Mukàndà wà Yakòbò, Yone, Luukà, Maakò, Maatàayi, Mukàndà wà Bwàkabuulwibwà Mikàndà Yebe yònsò ne, tudi pabwìpì ne ndekeelu. Ne nyewu tudi batàngije mpala mu Dyulu, mu disambila, misengeleelu, bwa kujandula ne mpenyi patùdì ne mwoyi, Mukalenge. Tudi babangè kumòna bukènkè bwa ditùkù bùbwayika. Nenku, Mukalenge, nyewu tulwa Kùdì. Diitabuuja

dyetu nditàngile Kúdi mpindyewu. Biikàle tutèèka ku luseke bujitu bwónsò, mpekaatu ne mpekaatu yónsò, bupidyà bwónsò bwa bukesè bùdi bufwànyìne kutùjìngìla anu bipeepèle nunku abu, tudi tukolesha mpindyewu batàngile ku kiipàcilà kàà dibiikila ditùmbùke, bamanyè ne dībà dyetu ndicincika.

<sup>167</sup> Bèneshàku bantu bàdi mwaba ewu aba, Mukalenge. MbaKunangè. Mbèèbè Wèwè. Mbapàtùke. Wèwè ng'Udi ufila dibuulula. Tudi tulòmba bwa Wèwè kutùpèèshakù bintu ebi patùdi baKwindile Wèwè apa.

<sup>168</sup> Watùpèèshakù mappingaja mîmpè a dilonga, Mukalenge. Watùpèèshakù dyumvwa. Watwàlujakù dilòòlò edi, ne dikàndà. Mukalenge, wàndaabakù mu mappingaja emu, kaa, pândi ndonga apu, Mukalenge, bwa twipàcilà tusambombo etu twa dimwènekelangana dya Ngabùdyèlè adi. Pìikalàbi ne Ngabùdyèlè wàkalwa bwa kumwènekelangana bwa kufila muumvwija asambombo, Mukalenge, tudi ne cya kumanya cyòci aci. Tudi tulongela ku Mikàndà ne tumanya ne tukàadi pabwìpi. Pa nanku tudi tulòmba bwa Wèwè kutùbuulwilacì dilòòlò edi.

<sup>169</sup> Dyàlumingu dilwalwà edi, Mukalenge, Éyi Nzambi, tèèkakù matùkù awu muntwamu. Mémè ncyèna mumanye mwa kupita naabi to, kadi Wèwè udi mwa kutùfikisha anu too ne ku cikondo aci mene. Enzàku nanku, Taatù. Tudi baKweyèmène Wèwè. Tudi banangàngàne muntu ne mukwèndè ne Mashi a Yesu Kilisto, Mwànà wa Nzambi, mmatùkezùle ku mpekaatu yónsò. Tudi baKweyèmène Wèwè mpindyewu. Ùtùkwàcìshèku patùdi baKwindile apa, Taatù, mu Yesu Mukalenge wetù. 



*DILEEJA DYÀ NJILA DYÀ NGABÜDYÈLÈ KÜDÌ DANYÈLÈ* LUA61-0730M  
(Gabriel's Instructions To Daniel)

DILONDANGANA DYÀ MALONGESHA PA MBINGU MAKÛMÌ MWANDAMUTEKÈTÈ YÀ DANYÈLÈ  
Diyiisha edi dya Mwaneetu William Marrion Branham dyakayiishiibwa bwa  
musangu wa kumpala mu Anglais mu dyàlumingu mu dinda, mu matùkù 30  
a ngondo wa mwandamutekète, cidimu cya 1961, mu Branham Tabernacle mu  
Jeffersonville, Indiana, U.S.A. Ndyumusha pa mukaba wa mêyì ne dituuta  
ku cyamu mu kaabujima kààdì mu Anglais. Nkudimwinu wa mu Ciluba ewu  
mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)